

1996

A

950

f 0.40

1297

HIKAJAT

POETROË HIDJO

GEUKARANG LÉ

A. RAHMAN

GEUPEUGËT KEU BASA ATJÈH LÈ

TEUNGKOE JAHJA



BALÈ POESTAKA

—

PEUTAWI

Wc W -

146 075 374

BIBLIOTHEEK KITLV



0128 1045

3/10/32

Mūs

1996 A 1297

Serie No. 950

HIKAJAT
POETROË HIDJŌ

GEUKARANG LĒ

A. RAHMAN

GEUPEUGĒT KEU BASA ATJĒH LĒ

TEUNGKOE JAHJA



BALĒ POESTAKA — 1931 — PEUTAWI

*Hikajat njoë hana djeuet djitjab atawa djsalén
teudjoemah lé baranggasoë malingkan lé njang
Po Ha' keudroë (Stsbl. 1912 No. 600).*



I

Béseumilah awaj phōn kalam,
 ngon nan Toehan po 'alam njoë
 Sipheuet Rahim deungon Rahman,
 gaséh Toehan baranggasoë
 Dalam dōnja neubri nè'mat, *neubri nè'mat*
 radja ra'jat saban sit droë
 Beukeusit Alah tan djiminat,
 halarat neugaséh han soë
 Oeroë doedoë di Blang Ma'sja,
 Rabbana neugaséh meusoë
 Oereueng mo'min lam sjeuroega,
 njang tjeulaka bit that roegoë
 Alhamdoe lélah saboh doe'a,
 keu Rabbana bandoem poedjoë
 Awaj akhé batén njata, *kyken, zien*
 la'én hana keu barangsoë
 Rahmat nè'mat neukarōnja,
 keu Soëdina doem *sinarōe*
 Moehamat Nabi sibeuna, *sebelahna*
 waréh doemna ngon sahbat droë
 Keu tabi'in sahbat rakan,
 rahmat sadjan malam oeroë

selamer briel
 Njang na patéh ban peuneusan,
 waréh tèelan asoë nanggroë
 Neubri nè'mat ja Rabbana,
 bè' na reuda malam oeroë
 Oelôn sadjan keunan himpôn,
manila mawel
 sjèedara kawōm adoeen adoë
 Neupeu'ampōn bandoem dèesja,
vader
 doe deungon ma lōn doea droë

II

Amma ba'doe njoë lōn peugah,
 saboh kisah lōn hareutoë
 Haba djameun bit that indah,
 le pa'idah keu barangsoë
 Poetroë Hidjō nan hikajat,
 Deuli meuhat rasi nanggroë
 Beukit geukheun narit moseutahé,
 djeuet eu dali tadjā' keudroë
 Baranggasoë na meuhadjat,
 djidja' sasat haj Deuli njoë
 Lhèe boh tanda sinan meuhat,
 njankeu ajat dali poetroë
 Dali njang phēn saboh tanda,
 ie moemata dalam boemoë
 Ba' manoë Tjoet Hidjō moeda,
 mantong njata trōih 'an djeunoë

Si'oelahan tamsé batèe,
 meunan lagèe dja' eu keudroë
 Tamita rèt njang djroh dilèe,
 mangat tateumèe teumpat poetroë
 Dalidji le han lé meuteuntèe,
 kon ban dilèe jōh na poetroë
 Njang keudoea dali tapham,
 saboh meureujam mantong djeunoë
 Sit ka poentōng njan meutanggam,
 han é' goelam geuhon toeloë
 Dalam koeta Radja Deuli,
 adoë poetroë ti njang seureuloë
 Atana Moëmoen nan geurasi,
 sinan dali mantong djeunoë
 Dalam koeta Midan Deuli,
 njankeu dali hikajat njoë
 Tanda keulhèe lom njan dali,
 rèt naga ili raja han soë
 Mantong euntjit tanda djidja',
 tanoh pipa' tamsé soengoë
 Djeuet takalon djeunoë tadjá',
 hana djara' rab sinan 'toë
 Lam ladang Deuli Masikoepè,
 bè' han meunè dja' eu keudroë
 Lhèe boh tanda njang na lahé,
 la'én han lé toepeue kamoë

Djeunoë la'én oelôn atō,
 poetroë Hidjō lōn hareutoë
 Lōn karang bè' rōh teukabō,
 bè' meutadjō panjang rampoë
 Sōbeuhanalah phōn lōn rawi,
 Tjoet poetroë ti njang sambinoë
 Deungon toelōng Po lōn Rabbi,
 beureukat doeli ajah Poetroë
 Doe'a goerèe bri idjadah,
 doe'a nang mbah lōn doea droë
 Eue Toehan bri moseutadjabah,
 lōn kisah doem haba poetroë
 Beureukat doe'a njang po kisah,
 ngon meutoeah toean poetroë
 Lōn poephōn ngon Béseumilah,
 éntja' Alah bè' moepaloë

III

Nanggroë Deuli lōn koerangan,
 ba' teumpat njan asaj kisah
 Dilèe masa tréb ka djameun,
 doem gob kheun Soelōtan meugah
 Hana sidroë na sipadan,
 koeta midan bit that locwaih
 Nanggroë ma'moe lom ngon aman,
 baranggadjan prang han tiwaih

Ra'jatgeu le Soelōtan radja,
 han é' kira that bahrōlah
 Sidroë sanè keunan teuka,
 meugah radja 'adé leupaih
 Hamba Alah doem até gala',
 sit meusa'-sa' keunan langkah
 Di nanggroë la'én keunan djidja',
 doem djigala' keu dèelat sjah
 Soelōtan Soeloëman nama radja,
 hoekōm han na tom brat siblah
 Droë deungon gob hana bida,
 neupoh neudra meung njo salah
 That meusjeuhoe 'adé radja,
 djeueb-djeueb dōnja bandoem meugah
 Aneu' nanggroë neugaséh sa,
 agam dara saban hébah
 Kaja gasien toeha moeda,
 tan na bida ba' Khalipah
 Meuntroë wadi neugaséh saban,
 bandoem djih njan neupeurintah
 Ngo lōn peugah hé sjèedara,
 poteu radja njang that meugah
 Ba' masa njan phōn tjalitra,
 lhèe droë poetra bri Pota'lah
 Aneu' toeha oereueng lakoë,
 roepa bagoë ban meuih meuntah

Salah batjoet wahé adoë,
 tan lôn toesoë nan geupeugah
 Hana nan dalam hikajat,
 ampôn sahbat lôn bè' salah
 Ba' piké lôn han peue tjatjat,
 beukit silab boeet boebé drah
 Aneu' teungoh toean poetroë,
 that sambinoë tan si'oelah
 Roepa indah hana bagoë,
 baranggasoë teuhah babah
 Soë njang kalon toean poetroë,
 mata laloë hireuen dasjah
 Hana djithèe malam oeroë,
 meunan bagoë hamba Alah
 That bit indah hana sakri,
 boeliadari sang-sang oelah
 Sang lakoe aneu' djén-pari,
 doemnan tari roepa indah
 Ba' masa njan tan pat peusa,
 dalam dōnja djeueb da'irah
 Han meuteumèe ada' tamita,
 njang é' peusa boeleuen peuet blaih
 Meung kon taqja' lam seuroega,
 tadja' mita djeueb-djeueb koebah
 Njan barō phōn njang é' peusa,
 ngon roepa Siti La'ibah

Ngon njan bandéng barō é' sa,
 poetroë moeda masja'alah
 Nama geukheun haj teungkoe e,
 Poetroë Hidjō meunan kisah
 Nan ngon roepa djroh meu'atō,
 darabarō boeleuen peuet blaih
 Njang adoë njan aneu' agam,
 siga' ragam salén nang mbah
 Aneu' toelōt poteu radja,
 niba' kada han pat tiwaih
 Oereueng lakoë sipeuet njata,
 njanpi hana nan geupeugah
 Siseun treu' lōn meu'aih dèesa,
 ba' sèedara njang beuet kisah
 Keureuna kon salah hamba,
 nan sit hana ba' naseukah
 Waréh kawōm doem sèedara,
 geukheun radja njang khalipah
 Soelōtan Soeloëman njang meulia,
 ban njang njata oelōn kisah
 Niba' awaj hikajat njoë,
 radja nanggroë tan lé dhōdjah
 Sit ka lawi meunan bagoë,
 ka neuwoë oeiba' Pota'lah
 Tinggaj aneu'neu ban lhèe droë,
 hiro keudroë di khalipah

Padoem lawét doedoë teuma,
 poteu radja that bit goendah
 Neu'ingat njan keu aneu'nda,
 tan lé boenda soë peurintah
 Sibarang haj han soë adja,
 beukit mongka han soë teugah
 Dawō' sabé ie mata trō,
 ingat djoedō njang ka leupaih
 Neu'ingat keu Poetroë Hidjō,
 boengong koendō njang that indah
 Ban lhèe droë njan sisèedara,
 aneu' radja meuntoej ba' mbah
 Ngon sabab njan po meukoeta,
 tan lé soeka mita dhōdjah
 Tan neuhadjat beu'éseutiri,
 Ampōn doeli neudoeë' dahsjah
 Padoem-padoem poetroë siti,
 aneu' Deuli meugah-meugah
 Geupeutaba keu Soeloëman,
 teurimong han di khalipah
 Salèh peue sabab djeuet keu meunan,
 han tatoeban peue neugoendah
 Teutab balèe radja dèelat,
 neudoeë' teutab aneu' droë papah
 Aneu'neu lhèe hiro gèt that,
 hana tjatjat meung boebé drah

Poetroë Hidjō njang leubèh that,
 sjah beudèelat neupeurintah
 Peue njang Poetroë djireuhadjat,
 deungon si'at asé moedah
 Gaséh sajang po meukoeta,
 aneu' dara tjahja limpah
 Lawét lawan padoem maca,
 sit rajeu' ka meuih keureutaih
 Nakeu 'oemoe ka moebida,
 kira-kira ka baligrah
 Kheunda' Alah Toehan asa,
 ma'noesia gadoh ilah
 Han djeuet oengki misé kada ,
 han neurila boet di Alah
 Ba' si'oeroë poteu radja,
 sakét teuka apōh-apah
 Neupoh-poh droë toembō' dada,
 Alah haj ja sajang leupaih
 Teuka tabib dja' peu'oebat,
 sjah beudèelat djidja' radjah
 Bè' njang poeléh sakét lom brat,
 bandoem oebat tan pa'idah
 Sit ka kada ba' halarat,
 ka 'oh nan hat neupeurintah
 Padoem lawét sakét Dèelat,
 wadi rajat bandoem soesah

Tan meugoena bandoem oebat,
 halarat makén that pajah
 Habéh langkah adjaj sampoë,
 radja neuwoë oebe' Alah
 Tinggaj koeta ngon meuligoë,
 aneu' lhèe droë njan keuneubah
 Tinggaj doem alat keuradjeuen,
 koeta mideuen nanggroë loeah
 Asoë nanggroë han djeuet takheun,
 sang oedjeuen ie mata limpah
 Radja-radja oelèebalang,
 doem wadi njang meugah-meugah
 Oelah lakoe akaj hilang,
 djipandang han lé khalipah
 Bandoem djimoë hana reuda,
 atana sang-sang ka reubah
 That meugoentjang niba' rasa,
 meunan roepa tangieng oelah
 Doem dëndajang lam meuligoë,
 han soenjoë ie mata limpah
 Leubèh lom that toean poetroë,
 neupoh-poh droë alōh-alah
 Neuwa adoeen deungon adoë,
 sara neuwoë poetroë indah
 Ie mata rō meuteutaloë,
 sang poedoë intan meuroeah

Sit ka ma'loem hé sèedara,
 lōn peuhaba tan pa'idah
 Baranggasoë maté ajahnda,
 pakri rasa até beukah
 Sit keubit that doekatjita,
 tan kèewasa oelōn peugah
 Ngon até droë sit tarasa,
 maséng rata mata bilaih
 Njang meukeusoet lam hikajat,
 sjah beudèelat hilang soedah
 Oereueng nanggroë meutjeugrōj that,
 radja ra'jat até goendah
 Além pakhi 'oh meusapat,
 meusjèewarat keu djeunadah
 Reudjang keumaih nan peue gralat,
 piké boelat jōh njan soedah
 Manjèt radja geupeu'èdat,
 ban deuradjat radja meugah
 Geuseumanoë ban njang 'adat,
 kapan leugat geubōh pantaih
 Lheueh geupasoë lam keureunda,
 meuseugit raja mè khalipah
 Oereueng 'além ngon panita,
 doem beuet doe'a djihej Alah
 Geupeuseumajang manjèt radja,
 teuma geuba oebe' koebah

Ladjoe geutanom jōh njan sigra,
 oeroë 'asa woë kapilah
 Padoem-padoem keuhōreumatan,
 keu Soelōtan njan ka leupaih
 Asoë nanggroë keudoeka'an,
 ma'loem toean han peue peugah
 Djeueb-djeueb gampōng dalam nanggroë,
 wadi meuntroë doem moë limpah
 That djisajang hana bagoë,
 tapakri roë boeet Pota'lah
 Aneu' radja njan ban lhèe droë,
 han é' kheun proë moë that goendah
 Ie mata rō malam oeroë,
 tamsé soengoë kroeng ka beukah
 Silawét tan doeli soelōtan,
 sit barangdjan meunan oelah
 Reulé até han treu paban,
 Alan Toehan kheun di babah
 Hana soë djeuet pajoe padan,
 bè' lé meunan tan djeuet teugah
 Njang leubèh that Poetroë Intan,
 sang teureuban reuhèt aroeah
 Lawét that tréb meunan lakoe,
 Boengong Meuloe dalam soesah
 Akhé-akhé bri Toehankoe,
 gadoh toenoe moewoë dahsah

Gadoh bandoem doekatjita,
 ra'jat radja han lé goendah
 Geubōh gantoë mat neuratja,
 aneu' toeha keu khalipah
 Hoekōm seunang sama rata,
 hana bida miseue ajah
 Poeboet ban boet poteu radja,
 hana tjoepa meung boebé drah
 Asoë nanggroë até mangat,
 bandoem ra'jat hana bantah
 Sabab radja boetneu djroh that,
 tjéng njang neumat tan brat sib'lah
 Ma'moe nanggroë le raseuki,
 lawét doeli mat peurintah
 Niba' dilèe leubèh lagi.
 siplōh bagi lom meutamah
 Radja moeda njang analan,
 that bidja'kan han si'oelah
 Ngon sèedara saboh djalan,
 barangdjan hantom bantah
 Lam moepakat nantiasa,
 han tom da'wa saboh patah
 Poetroë Hidjō boengong djeumpa,
 ngon sèedara meunan oelah
 'Ohnoë dilèe saboh leu'a,
 koereueng goera meung le kisah

Ho la'én lôn alèh haba,
 la'én radja oelôn peugah
 Mangat reudjang bè' that djoela,
 peu'ampôn dèetja Poteu Alah

IV

Amma ba'doe lôn bōh sarèh,
 nanggroë Atjèh lôn riwajat
 Darōsalam nanggroë leubèh,
 radja salèh le 'ibadat
 Até koesjoeë' keu rabbana,
 hantom loepa keu halarat
 Radja meugah le that tantra,
 ngon panglima bie' keubaj that
 Radja Atjèh sit geuthèe na,
 tinggaj nama ngon motabat
 Dalam nanggroë Poelo Roedja,
 Atjèh Radja geutakōt that
 Pahlawan le teuga-teuga,
 djiprang koeta reudjang loekat
 Ho djipeunab doem seureupha,
 biasa lam prang oetōih that
 Doem panglima gagah-gagah,
 goeda gadjah ribee la'sa hat
 Nanggroë Atjèh Darōsalam,
 dalam 'alam meusjeuhoe that

Hoekōm 'adé djroh neugeunggam,
 oeroë malam han tom tjatjat
 Oemoe moeda seudang lintō,
 goh na djoedō meuih teusoerat
 Roepa indah tan ngon oekō,
 boengong koendō bangon hibat
 Ba' si'oeroë oelōn peugah,
 ampōn meu'aih beukit gralat
 Poteu radja njang khalipah,
 neudoeë' sèekah niba' teumpat
 Meuntroë wadi doem béntara,
 ngadab radja njang meugah that
 Seumanjam ba' singgahsana,
 peugah haba ban njang 'adat
 Bri moepeuti doem sinaroë,
 wadi meuntroë kheun nasihat
 Pakri bangon atō nanggroë,
 deungon meuntroë neuemoepakat
 Hingga akhé seupōt oeroë,
 maséng doem woë oe'ba' teumpat
 Lheueh meudjamée djeunèh bagoë,
 neusalén sinaroë ban njang babat
 Misé 'adat njang ka poeroë,
 Radja nanggroë djihōreumat
 Radja-radja deungon meuntroë,
 sinaroë riwang oe teumpat

Kheunda' Alah po lön Toehan,
 masa njan oeroë djeumeu'at
 Seupöt Sabtoe ka rab malam,
 dèelat makam woë ba' teumpat
 'Oh ban tröih pintō atana,
 neudong radja sinan si'at
 Nab oe timoe pandang mata,
 Toehan boeka saboh tingkab
 Hingga gadoh tjahja oeroë,
 seupöt nanggroë timoe barat
 Teubiet boeleuen keu geunantoë,
 peugeuih han soë jōh njan si'at
 Radja neudong neuwa djaroë,
 neungieng bagoë doem lat-batat
 Djipöt angèn diroej asoë,
 radja nanggroë gala'neu that
 Teukeudi Toehan dat njang asa,
 saboh tjahja neu'eu djroh that
 Blah rèt timoe djeu'ōh raja,
 indah roepa mata ladat
 Tjahja hidjō radja pandang,
 meugeuloembang tamsé bakat
 Meuhaja'-haja' lakoedji sang,
 tjahja bandrang sang malakat
 Radja hireuen han peue peugah,
 teuhah babah jōh njan si'at

Beukit oeroë meunan oelah,
 peunoh babah djilōb lalat
 Neungieng tjahja meunan roepa,
 ba' neusangka sjoëtan la'nat
 Sang-sang hantoe niba' rasa,
 lam atana tamong leugat
 Sidroë wadi oereueng toeha,
 neujoeë teuka keunan si'at
 Neutanjong proë njan keu tjahja,
 panè teuka peue 'alamat
 Lōn eu hidjō indah roepa,
 tjoeba njata dja' talihat
 Neupeuleumah oelé radja,
 seureuta lagèe nasihat
 Meuntroë djaweueb ampōn radja,
 paté' hamba han trōih dapat
 Salèh sit Beutara Indra,
 salèh tjahja mala'ikat
 Hana trōih pham laman doeli,
 ampōn neubri njan han moepat
 Ba' lōn kalon tjahja djadi,
 djeu'ōh lawi la'én teumpat
 Bitpi meunan po meukoeta,
 meung njo radja neumeuhadjat
 Neukeumeung thèe panè tjahja,
 laman kira meunan djroh that

Neubri oereueng dja' peunjata,
 peue boe tjahja hoe hidjō that
 Beu meuteumèe djidja' mita,
 bè' djigisa meung goh moepat
 Radja deungo narit meuntroë,
 njo sit meunoë ba' neu'ingat
 Teutab 'oh nan radja neuwoë,
 meutamong droë oeoba' teumpat
 Oe atana tamong ladjoe,
 até rindoe goh lom teutab
 Ateueh tilam neubeuradoe,
 lam keuleumboe njang indah that
 Balé' keudéh balé' keunoë,
 Radja nanggroë goendahneu that
 Badan krôt-kreuet até wahwoë,
 tjahja boenoë sit teu'ingat
 Hana lom trang neukeutahwi,
 ampôn doeli 'adjébneu that
 Hingga beungoh soeboh oeroë,
 trôn dja' manoë jōh njan leungat
 Oe balè rōng neudja' Doeli,
 meuntroë wadi ka meusapat
 Meungadab halarat doeli,
 meuntroë wadi prèh sèewarat
 Peudana meuntroë kalon radja,
 niba' roepa dji'eu poetjat

Sang bangon oereueng meudjaga,
 até doeka meunan sang brat
 Han gèt lakoe meunan oelah,
 djibeu'oeet seumah lé djidèelat
 Ampōn doeli radja meugah,
 khalipah manjang deureudjat
 Pakon dèelat até doeka,
 kon ban njang ka misé 'adat
 Beukit salah paté' hamba,
 lōn rila ban boet Hadlarat
 Neuhoekōm lōn wahé radja,
 njan meukoeta bè' meularat
 Beukit moesōh keunoë teuka,
 neupeuhaba ba' lōn leugat
 Djeuet tjit djeunoë lōn oe loea,
 ampōn radja bè' goendah that
 Oelōn dja' prèh djih oe loea,
 bè' trōih teuka keunoë djih rab
 Meunan seumah toean meuntroë,
 radja nanggroë sinjōm hibat
 Até soeka po samlakoë,
 sabda djeunoë lé trōn leugat
 Leuma' mamèh neumeutitah,
 khalipah meunoë kheun pakat
 Wahé Meuntroë oelōn peugah,
 boekon soesah prang meukarat

Tan lam nanggroë keudoeka'an,
 tan bantahan aneu' ra'jat
 Teutapi lôn keusjoegrōjlan,
 tjahja hila han lôn toepat
 Baroë seupōt teungoh Moegréb,
 lôn that graléb pandang djroh that
 Oelôn harab oe ba' gata,
 tajoe mita beu'é' moepat
 Tajoe oereueng djeunoë boengka,
 tanjong haba timoe barat
 'Oh meuteumèe djiwoë landja,
 peugah haba ba' lôn leugat
 Bit pi meunan lôn peunjata,
 lôn njoë rasa sang meularat
 Meung njo han é' tamita njan,
 até lôn han njeum na oebat
 Kadang trōih ba' djandji Toehan,
 até lôn rawan tan trōih hadjat
 Meunan titah radja nanggroë,
 peudana meuntroë sambōt leugat
 Ampōn doeli njang meuboedoë,
 han oelôn woë meung goh moepat
 Bè' lé goendah Po samlakoë,
 neudjō' kamoë ba' halarat
 Sabda dèelat poteu radja,
 djaroë lôn boeka lakèe rahmat

Ba' Toehankoe lön meudoe'a,
 keu gata lön meuhon rahmat
 Dja' haj meuntroë njang seutia,
 seutèt tjahja njang hidjō that
 Deungon toelōng Toehan Asa,
 beu trōih gisa woë oe teumpat
 Beumeuteuntèe njang tamita,
 Toehan kaja njang peutoepat
 Teutab 'oh nan saboh leu'a,
 meuntroë boengka lön riwayat.

V

Amma ba'doe teuma lagi,
 idin neubri oelé radja
 Peudana meuntroë njan geudja' lé,
 wadi saré sidroë geuba
 'Oh lheueh idin niba' dèelat,
 beurangkat oe loea koeta
 Ngon beukajlan doem sileungkab,
 la'én ra'jat sidroë hana
 Neudja' doea la'én tan soë,
 malam oeroë neumeusapra
 Até goendah hana bagoë,
 sabab nanggroë meuri hana
 Hana meuho oedjoet kasat,
 han neutoepat asaj tjahja

Neupeudjō' droë ba' halarat,
 Toehan njang that amat kaya
 Oeroë malam neudja' soenggōh,
 hana piōh sikoetika
 Niba' badan tjoetjō reu'ōh,
 hoeteuen neublōh ngon beuloeka
 Neudja' mita hadjat Doeli,
 oeneun ngon wie neuparé'sa
 Kheunda' Toehan Rabbōn-djalé,
 leumah lahé lom njan tjahja
 Teuntang arah nanggroë Deuli,
 hana sakri indah roepa
 Tjahja hidjō sit ka meuri,
 teukab bibi droëneu doea
 Neumoepakat ban doea droë,
 keunan djeunoë gèt tahala
 Hingga neudja' ladjoe djeunoë,
 puteupat droë oeba' tjahja
 Na sikeudjab lheureh niba' njan,
 tjahja njan gadoh di mata
 Teubiet boeleuen ateueh awan,
 djroh lakoean peungeuih dōnja
 Djoela malam lam oeteuen doeroë,
 wadi meuntroë teungeut raja
 Oe tjōng kajèe neupiōh droë,
 ngon taloë badan neuhila

Ikat ajōn neu'ēh keudroë,
 bè' moepaloë rōt oe data
 Teungeut pangsān ban doea droë,
 beungoh oeroë barō djaga
 Ban doea droë neutrōn reudjang,
 dja' seumajang wa'tèe padja
 Até seunang han lé bimbang,
 sang moebajang hidjō tjahja
 Lheueh seumajang peureulèe soenat,
 ba' halarat lakèe doe'a
 Lakèe bantoe beuseulamat,
 beutrōih hadjat poteu radja
 Lheueh niba' njan teuma leugat,
 neubeurangkat rèt lam rimba
 Oeteuen seuma' han neu'ingat,
 goenong le that raja-raja
 Kheunda' Toehan sidroë Rabbi,
 Labōhan Deuli trōih geuhala
 Lam nanggroë neutamong wadi,
 han soë toeri meuntroë radja
 Neupeudjeuet droë misé koeli,
 padjōh gadji dalam banda
 Neutoeeng oepah mita raseuki,
 oebé gob bri tan da'wa na
 Piōh sinan padoem oeroë,
 bandoea droë gob thèe hana

Neuparé'sa keudéh keunoë,
 pat djeunèh njoë teuka tjahja
 Teukeudi Po ba' si'oeroë,
 gob hareutoë saboh haba
 Tjahja hidjō indah han soë,
 njankeu poetroë aneu' radja
 Poetroë Hidjō geurasi nan,
 aneu' Soelōtan Deuli toeha
 Roepa tjanté' tan teuladan,
 deungon intan siplōh ganda
 Njankeu tjahja poetroë intan,
 boekon toean bie' djén paja
 Boekon hantoe deungon sjoëtan,
 peuneudjeuet Toehan ma'noesia
 Meunan haba geuleungo ban,
 wadi jōh njan atē soeka
 Bandoea droë gala' han ban,
 tan lahé njan ba' gob njang na
 Bandoea droë gala'geu that,
 ka geutoepat asaj tjahja
 Timoeë djeunoë la'én hadjat,
 geumeung peurab gobnjan doea
 Nabsoe kalon toean poetroë,
 ngon mata droë neupeunjata
 Teuma doedoë 'oh trōih geuwoë,
 ba' radja droë peugah doemna

Geumoepakat ban doea droë,
 wadi meuntroë moebitjara
 Hasé pakat doem geumoeproë,
 dja' oe nanggroë Deuli Toeha
 Geumeung dja' eu toean poetroë,
 njang sambinoë Hidjō Moeda
 Han peue lawét reupoen rampoë,
 dja' doea droë keunan landja
 Loea koeta keunan langkah,
 mita ilah ngon bitjara
 Mita 'akaj ho rêt leupaih,
 tameulangkah dalam koeta
 Misé paki peuroepa droë,
 oelah bagoë oereueng hina
 Mita raseuki keudéh keunoë,
 tamong doea droë dalam koeta
 Bandoem oereueng djihiro tan,
 bah djidja' njan oereueng papa
 Mita raseuki djidja' jōh njan,
 bri idin njan oereueng hina
 Trōih lam koeta geupiōh droë,
 ba'-ba' sagoë na bè' njata
 Hana that tréb sinan lhèe oeroë,
 goh lom moeproë ban geupinta
 Goh lom Toehan bri hadjat droë,
 roepa poetroë leumah hana

Doekatjita wadi meuntroë,
 meuhon doea droë ba' Rabbana
 Geumeudjaga oeroë malam,
 geumeung pandang Hidjō Moeda
 Toelōng Toehan Po Hadlarat,
 trōih ba' sa'at leumah njata
 Ba' simalam lōn riwayat,
 meuih adjeumat lōn peuhaba
 Malam njan malam Djeumeu'at,
 peuhah tingkab lam atana
 Poetroë Hidjō aneu' dèelat,
 neubeurangkat trōn oe loea
 Ka neuboeka saboh tingkab,
 blah rèt barat tjeungeu' moeka
 Wadi meuntroë sinan geunab,
 geu'eu deuih that poetroë moeda
 Djarōë gaki jo meutat-tat,
 geungieng gèt that tjeudaih roepa
 Sang-sang pangsan jōh njan si'at,
 sang-sang teumpat lam sjeuroega
 Meunan bagoë ba' peurasat,
 mata ladat meuntroë doea
 Poetroë Hidjō 'oh geulihat,
 sang malakat Soeloëman radja
 Sang-sang bè' tjré lé silangkah,
 meunan oelah di peudana

Geu'oetjab sjoekō poedjoë Alah,
 Alhamdoelélah geubeuet doe'a
 Sōbeuhanalah meuhasoetji,
 Toehankoe Rabbi that koeasa
 Neupeudjeuet roepa poetroë siti,
 djeuet beureuhi ma'noesia
 Si'oelah roepa boeliadari,
 njang ban ili lam sjeuroega
 Meunan kheun lé doea meuntroë,
 toean Poetroë lôn tjalitra
 Malam djoela ban 'adat droë,
 teutōb lé keudroë tingkah njang na
 Poetroë tamong lam meuligoë,
 tjahja boenoë gadoh doemna
 Teukeudjōt peudana meuntroë,
 geu'eu poetroë han meuhoka
 Deungōn rakan geumeutjakri,
 oeba' wadi tanjong haba
 Tohkeu padan djeunoë akhi,
 njang tatjari sinoë ka na
 Ka trōih tadjā' nanggroë Deuli,
 hadjat Doeli lahé njata
 Njang moseulihat djeunoë pakri,
 tjoeba kheun kri oelé gata
 Djaweueb rakan meunoë bagoë,
 piké lôn njoë gèt tagisa

Nanggroë Atjèh oedéh tawoë,
 dja' peugah proë oeoba' radja
 Peue njang tangieng lam nanggroë njoë,
 ba' radja droë peugah doemna
 Na djeuet dèelat Po geutanjoë,
 seunang até droë han lé doeka
 Peudana ngo meunan oelah,
 sang geukeubah dalam dada
 Lheueh njan leugat neutjo' langkah,
 teubiet leupaih loea koeta
 Mangat até ban doea droë,
 saboh tan soë toeri bahsa
 Deungon toelōng Toehan sidroë,
 Po geutanjoë kadim baka
 Trōih oe loea bandoea droë,
 leugat geurwoë Atjèh Raja
 Padoem lawét meusapra droë,
 trōih oe nanggroë lé ban doea
 Oe lam koeta tamong reudjang,
 radja pandang até soeka
 Sjah beudèelat aténeu seunang,
 neukalon riwang meuntroë gisa
 Na sikeudjab piōh pajah,
 toerōn titah niba' radja
 Neutanjong pakri asaj sasilah,
 lōn eu bagaih trōih tagisa

Na meuteumèe njang tatoentoet,
 takheun batjoet oebe' hamba
 Peudana meuntroë seumah soedjoet,
 toelōng Ma'boet sidroë asa
 Beureukat doe'a Ampōn doeli,
 Toehan neubri asé pinta
 Lōn dja' lōn woë toelōng Rabbi,
 djarōë gaki lōn sidjahtra
 Djeueb-djeueb nanggroë oelōn soedi,
 hana khali tanjong haba
 Ngon beureukat doe'a Doeli,
 trōih oe Deuli ngon sidjahtra
 Laman sasat keudéh keunoë,
 lōn tanjong proë hidjō tjahja
 Padoem lawét teuma doedoë,
 lōn teumèe proë saboh haba
 Tjahja hidjō gob hareutoë,
 kon doë sroëbroë hantoe rimba
 Kon tjahja djén sjoëtan pindoë,
 tjahja poetroë aneu' radja
 Njankeu aneu' Radja Deuli,
 nan geurasi Hidjō Moeda
 Roepa indah hana sakri,
 boeliadari sang keumeung sa
 Tan teuladan djeueb-djeueb nanggroë,
 teukab bibi droë soë ngieng njata

Até rindoe that beureuhi,
 akan Tjoet Ti Hidjō Moeda
 Hana bandéng dalam 'alam,
 dèelat makam ba' lōn kira
 Misé tjahja hoe lam malam,
 meunan tapham khoeloe' roepa
 Alah haj po Dèelat Doeli,
 sang lōn radli hilang njawa
 Beukit rōh njan djoedō Doeli,
 keu soeri soenténg atana
 Sit gala' lōn djoendjōng doeli,
 Gōseuti lōn poemeulia
 Lōn hōreumat hana poetōih,
 ngon até toelōih oelōn kira
 Ba' haté lōn han meu'oengki,
 simasa Toehan bri mantong njawa
 'Oh nan seungab meuntroë wadi,
 that beureuhi até radja
 That bit rindoe han é' theun droë,
 sang beu djeunoë neutoeeng landja
 Sang neudja' oe Deuli nanggroë,
 jōh goh oeroë lom keuloea
 Até soesah radja dèelat,
 moeka poetjat lam beutjinta
 Akan poetroë meuih adjeumat,
 sit teu'ingat han lé loepa

VI

Amma ba'doe ba' si'oeroë,
 samlakoë radja meudèelat
 Sabab aténeu that wawoë,
 deungon meuntroë peudoeë' pakat
 Dja' seulangké toean poetroë,
 Deuli nanggroë dja' beurangkat
 Meung kon meunan sang moepaloë,
 radja nanggroë hana meuh
 Keumaih pakat sit ka asé,
 neuhej saré doem sileungkab
 Han tréb lawét lheueh geupiké,
 kapaj ka asé peudieng alat
 Peuseumahan boengong djaröë,
 oeba' meuntroë neujoë euntat
 Keu Soelōtan Deuli nanggroë,
 adoëen poetroë meuih teusoerat
 Saré tjoekōb doem sibagoë,
 peudana meuntroë lé beurangkat
 Deungon rakan na padcem droë,
 wadi meuntroë njang moepangkat
 Oereueng toeha pi na sadjan,
 peutjaja'an radja dèelat
 Oe Deuli ladjoe haloean,
 mè peuneusan meunan hadjat

Kapaj boengka lajeue timang,
 peuseunang oe timoe teupat
 Meusoe taloë sang meurang-rang,
 meujoeb manjang dalam bakat
 Angèn pi djroh reumbang pa'sa,
 doem lam béhtra até mangat
 Meulajeue seulat Meulaka,
 hana mara lama riwajat
 Oeroë malam tan beureunti,
 Nanggroë Deuli tjita hadjat
 Até soenggōh doem keulasi,
 han pseudoeli keu meularat
 Ladōm mabō' mangat asoë,
 keumeung trōn droë doem oe darat
 Kapaj djiploeeng misé geulét,
 dji'apét rijeue' ngon bakat
 Padoem lawét lam geuloembang,
 deuih geupandang ka tō' ba' hat
 Nanggroë Deuli lakoean sang,
 geudjeumeurang teuma leugat
 Geulhom sa'ōh kapaj meuntroë,
 ngon keumoedoë pi geusingkat
 Beudoih keulasi toeman di djaroë,
 djitōt djeunoë beudé noebat
 Tōt meureujam soe meutaga,
 reujōh soebra soe oe darat

Oereueng nanggroë até doeka,
 sang-sang teuka moesōh le that
 Asoë peukan Deuli Toeha,
 ba' Sahbanda ploeng doem leugat
 Djidja' peugah teuka bala,
 toh bitjara pakri pakat
 Sahbanda leungo haba meunan,
 é' lam sampan ladjoe peurab
 Padoem-padoem droë geuba rakan,
 meukeusoet njan keumeung sasat
 Trōih oe kapaj lé sampan njan,
 djoeragan landja geudèelat
 Geubri hōreumat keumeulia'an,
 doea djaroë njan beu'oet leugat
 Ban meuroempa' ngon nahoeda,
 saleuem sigra geupeu'èdat
 Asalamoe'aloëkōm hé sjèedara,
 panè gata han lōn toepat
 Peugah ba' lōn lōn paré'sa,
 ho neuhala peue na hadjat
 Beudé lōn ngo that meutaga,
 peue bitjara wahé sahbat
 Nahoeda djaweueb bagaih han ban,
 aloëkōm salam lōn di barat
 Nanggroë Atjèh Darōsalam,
 sinan makam kamoë teumpat

Lōn trōih keunoë hé sjèedara,
 Soerōh radja njang meudèelat
 Kon nabsoe meudja' toeeng koeta,
 hana soeka meukhōseumat
 Dèelat kamoë njang meulia,
 meusjèedara meunan hadjat
 Radja sinoë Deuli Toeha,
 dalam dada meunan seubat
 Neusoerōh kamoë sineuna,
 ngadab radja sjah beudèelat
 Peuseumahan doem neujoee ba,
 ban biasa 'adat dèelat
 Gaséh sajang hé sahbanda,
 kamoë neuba ba' halarat
 Dja' tjōm kawōih meuhameulia,
 sikada lōn bri hōreumat
 'Ohanan toetō ba' nahoeda,
 sahbanda até that mangat
 Gadoh soesah doekatjita,
 teuka soeka jōh njan leugat
 Lam kapaj meusoeka-soeka,
 hingga djoela trōn oe darat
 Sadjan wadi ngon bēntara,
 djamèe teuka njan di Barat
 Geuhōreumat doem poemeulia,
 seureuta geubri ngon teumpat

Niba' roemoh droë Po Sahbanda,
 that meulia papah gèt that
 Geupeudjamèe bandoem rata,
 ban njang kada deungon sjarat
 Singoh beungoh teuma geuba,
 oe lam koeta dja' meungadab
 Han peue panjang lôn tjalitra,
 trôih lé teuma ngon sisa'at
 Oeba' koeta radja Deuli,
 keunan wadi dja' ban 'adat
 Kawaj pintō phôn seumoedi,
 panè nanggri 'oh na hadjat
 Oereueng Atjèh djaweueb jōh njan,
 kamoë toean trôih di Barat
 Meudja' keunoë keu antōsan,
 mè peuneusan sjah beudèelat
 Nanggroë Atjèh keunoë meusi,
 oeba' doeli tjinta hadjat
 Si keumawaj deungo rawi,
 peuseumah djibri jōh njan leugat
 Dja' peuseumah oeba' radja,
 djikheun haba ban njang teupat
 Sjahi 'Alam ngo tjalitra,
 trôn lé sabda: „tamong leugat”
 Kawaj pintō teuma jōh njan,
 ba' antōsan dja' peugah hat

'Oh geudeungo haba meunan,
 ba' masa njan tamong leugat
 Trōih lé leugat dalam koeta,
 peudahna wadi ngon ra'jat
 Peuteupat oe singgahsana,
 djaroë doea lé geu'angkat
 Geuhōreumat djroh meuteuntèe,
 teukoej oelèe seumah dèelat
 Keulakoean sit ka tathèe,
 teuradjèe oereueng moepangkat
 Peu'é' seumah meunoë kata,
 ampōn radja sjah beudèelat
 Nanggroë Atjèh laman teuka,
 dalam tjinta keunoë kasat
 Neusoerōh oelé Sroëpada,
 meu'aih dèesja meunan hadjat
 Peuseumahan keunoë neujoe ba,
 ban sikada kon ban sjarat
 Harab ampōn wahé radja,
 bè' that neukira ban njang 'adat
 Tanda jakin po meukoeta,
 ba' adé'nda njang di barat
 Nabsoe hadjat meusjèedara,
 di dōnja kon tō' akhirat
 Ngon toeankoe djeuet sjèedara,
 droëneu doea saboh pangkat

Nanggroë Atjèh deungon Deuli,
 beu Toehan bri é' meusapat
 Deungon toelông ba' Ilahi,
 djeuet keu ahli tèelan sahat
 Hadjat niba' radja kamoë,
 ka tréb Po kamoë meunan kasat
 Neujoeë laman ba' si'oeroë,
 loea nanggroë lôn beurangkat
 Lôn blôh oeteuen deungon doedoë,
 malam oeroë lôn dja' leugat
 Moeboeleuen dja' moeplôh oeroë,
 trôih ba' nanggroë ampôn dèelat
 Nanggroë Deuli trôihkeu hamba,
 lôn gisa teuma oe barat
 'Oh trôih lôn woë oe'ba' radja,
 lôn peuhaba djroh 'akibat
 Keulakoean doem lôn peugah,
 radja meugah ngon 'adé that
 Radja Atjèh deungo kisah,
 gala' dahsjah rindoeneu that
 Neujoeë laman lom ngon wadi,
 keunoë ba' Doeli ampôn dèelat
 Lôn ba amanat niba' Doeli,
 toelông Rabbi trôih ban hadjat
 Ka trôih laman ba' meukoeta,
 ampôn radja lôn peu'èdat

Meung na gaséh deungon ridla,
 keu sjèedara nanggroë barat
 Keureuna radja nanggroë Atjèh,
 that neugigèh keu halarat
 Neutoentoet boeet rèt njang leubèh,
 laman sarèh ban njang 'adat
 Radja Atjèh até bingong,
 keu boengong nabsoe that hadjat
 Neukeumeung tjot hana reunong,
 neujoe tanjong oebe' dèelat
 Gaséh sajang sit neupinta,
 ampōn radja njang neuharab
 Sabab doeli njang po areuta,
 beukit rila hasé si'at
 Harab neubri keu adé'nda,
 dalam dada meunan kasat
 Neuharab Toeankoe simata-mata,
 hana doea pandang djasat
 Beudjeuet neutoeeng keusjèedara,
 adé'nda meunan neuhadjat
 Radja Deuli ngo hareutoë,
 seumah meuntroë trōih di barat
 Até koejoe radja nanggroë,
 sang-sang bagoë teukeudjōt that
 Hana leumah lahé njata,
 sit neusaba sjah beudèelat

Teuma doedoë trôn lé sabda,
 ngon soeara peuleuheuen that
 Wahé meuntroë njang antōsan,
 deungo laman peugah teupat
 Até oelōn that soeka'an,
 sang intan deungon malakat
 Radja Atjèh meunan pinta,
 ngon hamba lakèe moepakat
 Ènsja' Alah lōn that soeka,
 tan lōn da'wa oebé hadjat
 Meusé ban haj njang neutjinta,
 han peue soeka lōn ridla that
 Piōh meuntroë sikléb mata,
 tasaba meung dang lōn sasat
 Boengong Intan njang neupinta,
 njo keubit na njang neuhadjat
 Hana pajah ba' lōn kira,
 asé pinta deungon si'at
 Sit lōn peudjō' njan keu radja,
 bè' lé doeka Doeli Dèelat
 Gèt tapiōh dilèe sinoë,
 meung lhèe oeroë hana trèh that
 Meusjèewarat lōn dilèe ngon droë,
 ban njang doedoë keumaih pakat
 Lōn bri djaweueb teuma doedoë,
 'oh ka poetroë sapeue pakat

Meuntroë Atjèh ngo hareutoë,
 gala' han soë até teutab
 Han lé soesah ba' keunira,
 keun poetroë moeda trôih ban kasat
 Deungon toelông Toehan asa,
 trôih pinta oebé neuhadjat
 Beu'oeet djaroë seumah doeli,
 radja Deuli geuhōreumat
 Di loea koeta neupiōh lé,
 bandoem saré sit meusapat
 Lōh kisah keu radja Deuli,
 dalam poeri tamong leugat
 Dalam até hana meukri,
 oelahan ri meusjeugrōj' that
 Leumoh badan toeleueng seundi,
 ampōn doeli jo meutat-tat
 Neupiké keu radja Atjèh,
 oereueng leubèh raja pangkat
 Kadang-kadang sit han djadèh,
 pakri salèh sang meukarat
 Lōn takōt poetroë han gala',
 toh rèt tindja' bè' meudlarat
 Dalam piké poteu radja,
 lhèe sjèedara ba' sipakat
 Ba' Poetroë Hidjō neupeuteuka,
 nabsoe radja meusjèewarat

Saré trōih ba' singahsana,
 ba' adé'nda meuih teusoerat
 Poetroë Hidjō njang djroh roepa,
 meutjahja tamsé malakat
 Sinan teudoeë' boengong keumang,
 ngon dëndajang doem meusapat
 Ban neu'eu trōih njan kaka'nda,
 beudoih sigra bri hōreumat
 Tjōm di teu'ōt poteu radja,
 djaroë doea lom neu'angkat
 Lakèe langkah ateueh keuta,
 doeë' peusila oeëba' teumpat
 Neutjo' poean lé oe djaroë,
 lé sambinoë roepa djroh that
 Siti seumah marit meunoë,
 doea djaroë lom neu'angkat
 Ampōn meu'aih hé kaka'nda,
 peue na sabda wahé dèelat
 Njang trōih langkah po meukoeta,
 ba' dé'nda neudja' Dèelat
 Djaweueb Radja njang meuboedoë,
 hé sambinoë meuih teusoerat
 Rajeu' hadjat lōn haj poetroë,
 njang trōih keunoë oelōnperab
 Njang meukeusoet trōih lōn keunoë,
 ngon sambinoë dja' moepakat

Lōn harab boengong seuroenoë,
 bè' rōh doedoë djeuet keu gralat
 Bè' beungèh adé' bangsawan,
 sangkira han keunong sjarat
 Walèe batjoet djeuet soekaran,
 piké intan ngon moseulihat
 Ngo lōn peugah boengong poetéh,
 njang lōn gaséh tjit leubèh that
 Trōih antōsan nanggroë Atjèh,
 radja leubèh blah rèt barat
 Meuntroë wadi keunoë teuka,
 sadjan geuba deungon ra'jat
 Geumeunabsoe boengong djeumpa,
 meunan tjinta Ampōn Dèelat
 Akan gata haj boh até,
 soentō' sabé lam teu'ingat
 Keunoë geujoe dja' seulangké,
 pakri piké meuih adjeumat
 Radja Atjèh bit that meugah,
 raja sjèekah loewaih neumat
 Djeueb-djeueb nanggroë meusjeuhoerah,
 keu Pota'lah poeboeet ta'at
 Tatoeeng adé' keu sawami,
 gata lōn bri nanggroë Barat
 Meungnjo rila tjoet poetéh di,
 djaweueb tabri keu lōn leugat

Wahé adé' tjahja mata,
 ba' lôn kira indah sangat
 Bah tatoerôt nabsoe radja,
 beu sampōna tahōreumat
 Bè' weueh até djamèe teuka,
 keu sjèedara djeuet meusambat
 Antara lôn deungon radja,
 sabab gata é' moepakat
 Doemnan narit po meukoeta,
 poetroë moeda moeka poetjat
 Sit tidjoh lé ngon ie mata,
 oelah roepa meusjeugrōj that
 Ngon peuleuheuen meusoeara,
 djaweueb sabda seumah dèelat
 Harab ampōn ba' sroëpada,
 kaka'nda neupiōh si'at
 Ba' até lôn goh lom moeproë,
 nama lakoë goh lom hadjat
 Keureuna lôn masa djeunoë,
 ma'loem keudroë ampōn dèelat
 Ba' pikéran sang han meukri,
 keu éseutiri radja moepangkat
 Gèt bah dilèe piōh Doeli,
 lôn bè' neubri ba oe barat
 Seunang soesah doem sagaj bé,
 ba' droëneu saré lôn meuhadjat

Silawét tan boenda ngon ajahnda,
 lôn kaka'nda bit soesah that
 Rindoe deundam han tom reuda,
 goh lom ridla oebé hadjat
 Ngon sabab njan ampōn kaka'nda,
 gèt neusaba dilèe si'at
 Bè' djeuet 'ajéb doedoë teuka,
 ateueh ka'nda doem gob oepat
 'Ohnan narit Poetroë Hidjō,
 teudoe' tahe radja dèelat
 Sit han djeuet lé neumeutoetō,
 teupakō masa njan si'at
 Lakèe idin ba' sambinoë,
 beudoih neuwoë oeba' teumpat
 Dalam até soesah han soë,
 keu adé' droë sajangneu that
 Trōih oe teumpat piōh pajah,
 Po Dèelat sjah neu'éh leugat
 'Oh ban beungoh la'én kisah,
 trōn Dèelat Sjah niba' tempat
 Oe balè rōng ladjoe neutèh-tèh,
 oereueng Atjèh joe toeeng leugat
 Hana lambat radja neuprèh,
 oereueng Atjèh lé meusapat
 Ba' takalon moeka reumèh,
 hana beungèh sidroë ra'jat

Sabab sangka teuntée djadèh,
 Radja Atjèh trōih ban hadjat
 Ban saré trōih piōh pajah,
 khalipah geubri hōreumat
 Sabda radja énsja' Alah,
 ngon lōn peugah wahé sahbat
 Njang leubèh gèt tawoë dilèe,
 tadja' bri thèe oebea' Dèelat
 Saleuem lōn meuribèe-ribèe,
 keu panghoelèe nanggroë barat
 Akan hadjat di Soelōtan,
 kheunda' Toehan ka neusingkat
 Han é' asé pinta Soelōtan,
 oelōn paban wahé sahbat
 Lōn woë beuklam tjré ngon gata,
 ba' adé'nda lōn dja' leugat
 Lōn dja' peugah sabda radja,
 seureuta lōn kheun nasihat
 Kheunda' Alah ka teukeudi,
 poetroë siti goh meuhadjat
 Han djitém lōn bri sawami,
 gadoh boedi lōn soesah that
 Lōn meung peukreueh hana meukri,
 asé keudji ngon meularat
 Kadang teulaih doedoë pakri,
 lōn djeuet keudji ba' djeueb Dèelat

Keureuna njan wahé meuntroë,
 gèt bah tawoë dilèe si'at
 Takheun seumah saleuem lôn njoë,
 deungon poedjoë njang le-le that
 Keu Soelôtan nanggroë Atjèh,
 radja leubéh raja pangkat
 Lôn hôreumat até poetéh,
 beu neugaséh lôn hina that
 Meu'aih ampôn ba' khalipah,
 boebaj khilaih bè' meudlarat
 Sabab boeet njoë khunda' Alah,
 poeeh lôn peudjlaih soekaran that
 Harab bè' djeuet moekhalapah,
 soesah khalipah saba si'at
 Kheunda' Toehan tapakri bah,
 'oh nan toeah ba' iradat
 Bè'keu laman neu'amarah,
 boekon salah lôn tan 'adat
 Han é' asé oelôn ilah,
 meunan njang sah wahé sahbat
 Keureuna boeet keubadjikan,
 wadjéb sinan beumoepakat
 Beukit rila poetroë intan,
 lôn toean até gala' that
 'Oh nan sabda Radja Deuli,
 geudeungo kri moeka poetjat

Oereueng Atjèh soesah até,
 sabab Siti han moepakat
 Sara geubeudoih meuntroë wadi,
 Radja Deuli geuhōreumat
 Ampōn dèelat doem sagaj bé,
 doem saré kheunda' halarat
 Poetōih harab radja kamoë,
 sabab poetroë meuda'wa that
 Pakri salèh trōih oe nanggroë,
 radja kamoë djeuet sjoegrōj that
 'Oh neuthèe hadjat han sampoë,
 kadang paloë ampōn dèelat
 Dilèekon até teugoë-goë,
 sang-sang keudroë neubeurangkat
 Neudja' sambōt poetroë intan,
 até rawan djeueb-djeueb sa'at
 Piha' harab keu soelōtan,
 neusangka han meunoë gralat
 Idin dèelat lōn keumali,
 singoh Doeli lōn beurangkat
 Seulamat tinggaj nanggroë Deuli,
 meu'ili moewoë oe barat
 Lōn dja' poewoë haba sarèh,
 nanggroë Atjèh oe'ba' Dèelat
 Disinoë han djeuet lōn talèh,
 keudéh sarèh lōn toeeng pakat

Habéh 'oh nan narit meuntroë,
 beu'oeet djaroë bri hōreumat •
 Di balè rōng doem geutrōn droë,
 riwang doem njoë oebea' teumpat
 Até soesah ban sinaroë,
 weueh han bagoë moë doem ra'jat
 Ingat narit radja nanggroë,
 sang djipoh droë meunankeu hat
 Trōih oe teumpat dalam khimah,
 geumeukeumaih teuma leugat
 Ngon si'at hasé lé keumaih,
 bri peurintah oebea' ra'jat
 Beudoih boengka ladjoe geuwoë,
 oe nanggroë droë nab oe barat
 Piōh 'oh nan dilèe njang njoë,
 la'én djeunoë oelōn sambat.

VII

Amma ba'doe lom lōn sarèh,
 nanggroë Atjèh lom lōn rawi
 Khalipah radja peuniléh,
 seun silapéh lōn peugah kri
 Masa phōn antōsan boengka,
 poteu radja mangat até
 Gadoh soesah doekatjita,
 seuntōsa seunang ngon piké

Ba' Toehankoe neumoe pinta,
 ngon meuleuha sidroe Rabbi
 Beu'é' asé ban neutjinta,
 poetroë moeda njang djohari
 Soentō' ladém neumeudoe'a,
 ngon karōnja dat Ilahi
 Neutheun até niba' doeka,
 sit neusaba ampōn doeli
 Neuprèh woë antōsan boengka,
 dja' meusapra nanggroë Deuli
 Moebō'-bō' até lam dada,
 padoem masa tan na khali
 Silama goh woë antōsan,
 Soelōtan radja njang ahli
 Dalam harab baranggadjan,
 ba' Toehan Rabboen 'èdati
 Padoem lawét meunan bagoë,
 tō' 'an trōih woë doemna meuntri
 Leubèh koereueng peuet plōh oeroë,
 deungo djeunoë la'én rawi
 Ba' si'oeroë radja meugah,
 khalipah njang that oegahri
 Di balè rōng doe' moedakarah,
 ngon djeumeu'ah meuntroe wadi
 Panglima prang ngon béntara,
 ngadab radja doem meuriti

Doem tjoet raja toeha moeda,
 doee' moebandja adab Doeli
 Maséng babat ila kada,
 ta'eu roepa djroh moebiti
 Sjah beudèelat neumeusabda,
 ngon soeara misé bangsi
 Hé mama'nda peudahna meuntroë,
 takheun djeunoë keu lôn pakri
 Antōsan dja' lawét sampoë,
 dja' toeeng poetroë tanoh Deuli
 'Oh noë masa hana lom woë,
 sang moepaloë ba' lakoe ri
 Tan habaran njang woë keunoë,
 até lôn njoë hana meukri
 Meung njo meunan ba' lôn piké,
 gèt bahlé gata ta'ili
 Tameusapra rèt dalam glé,
 beukit maté reudjang meuri
 Ba' até lôn hana seunang,
 meung goh riwang doem sipa'i
 Lôn piké sabé tan seunang,
 até bō'bang hana soenji
 'Oh nan barō sabda dèelat,
 goh meusambat la'én rawi
 Kawaj pintō trōih djiloempat,
 djidèelat ba' Ampōn Doeli

Sara djikheun Po djōndjōngan,
 antōsan ka woë doem meuntri
 Seumah saleuem keu Soelōtan,
 lōntoean geunjoe ba' Doeli
 Radja deungo kawaj peuseumah,
 soeka dahsjah hana sakri
 Gadoh soegrōj moeka mirah,
 Aleuhamdoelélah njan di bibi
 Neumeutitah oe ba' meuntroë,
 antōsan droë toeeng djeunoë lé
 Leugat tadjā' bè' lé laloë,
 bè' tréb djeunoë tapoewoë lé
 Lōn hadjat keumeung deungo proë,
 pakri bagoë haba Deuli
 Salèh asé pinta kamoë,
 Tjoet poetroë intan teupoedi
 Meuntroë sidroë deungo titah,
 beudoih langkah ngon sipa'i
 'Oh trōih keudéh han peue kisah,
 doem geupeugah sabda doeli
 Awaj akhé doem atōran,
 antōsan geudeungo rawi
 Han tréb lawét doedoë ba' njan,
 beudoih rakan iréng meuntri
 Oe lam koeta trōih lé meuntroë,
 ban sinaroë djoëndjōng doeli

Bri hōreumat beu'oeet djaroe,
 radja nanggroe neutanjong kri
 Peue habaran wahé meuntroe,
 njang tapoewoe nanggroe Deuli
 Pakri pakat sidéh ba' poetroe,
 keu geutanjoë salèh geubri
 Salèh asé ban lôn pinta,
 poetroe moeda lôn beureuhi
 Tjoeba takheun lôn ngo njata,
 ban kheun radja jöh di Deuli
 Meuntroe deungo meunan sabda,
 Ampôn Radja phôn djikheun kri
 Harab bè' djeuet teumeureuka,
 lôn peuhaba ban njang meuri
 Misé titah ba' Sroëpada,
 tan meutoeka boebé sawi
 Ngon meukeusoet lôn peuhaba,
 batén njata lôn poemeuri
 Akan teutapi wahé radja,
 'ohnan kada ba' Ilahi
 Ba' njang tjinta ampôn dèelat,
 halarat goh lom neurali
 Laman kira njo malakat,
 'oh lôn mat ka la'én meuri
 Radja Deuli gala' rila,
 poetroe moeda njang han ra'li

Njang kon narit geupeuhaba,
 sang geupeukra Ampōn Doeli
 'Adjib oelōn ngieng lakoean,
 keu'ada'an radja Deuli
 Bē' lakoe peugah habaran,
 haba njang tan doem geurawi
 Koereueng 'èdat keu Soelōtan,
 batjoet pi tan geupeudoeli
 Padoem narit paté' laman,
 keumanèhsan hana sakri
 Lōn djoendjōng lōn bri hōreumat,
 lōn peu'èdat tamsé Doeli
 Meung batjoet hana geuminat,
 doem ngon mangat lōn bōh ta'wi
 Geuthèe that njan keu meugah droë,
 lawan han soë baranggari
 Sang-sang tan lé la'én nanggroë,
 Atjèh njoë goh lom geutoeri
 Sang toeankoe boekon raja,
 sinoë hana meuntroë wadi
 Salèh pakri ba' geusangka,
 gobnjan teuga ba' barangri
 Ampōn dèelat namietneu njoë,
 malèe hansoë trōih oe Deuli
 Tan nareuga sang padé doë,
 sit geujoe woë ladjoe ili

Ngon tan salah geupeutoela',
 boeet njang kon ha' ateueh Doeli
 Kon doë kamoë njang geutoela',
 keu Dèelat gla' tan pseudoeli
 Hian geubri toë keunan lé dja',
 geupeuroesa' lam kaleubi
 Meung kon malèe paté' laman,
 keu djōndjōngan lom lōn piké
 Na njeum lōn maté leugat sinan,
 sangkira kon meunan tan lōn woë lé
 Teumakōt lōn wahé radja,
 han trōih haba oebea' Doeli
 Beuki maté lōn teuhanta',
 soë peugisa haba rawi
 Lōn ingat njan bah lōn saba,
 tjarōt tanpa pi lōn asi
 Meunankeu boeet wahé radja,
 han lé daja gadoh boedi
 Malèe lōn that hana bagoë,
 sang geutanjoë mano' gasi
 Sang han tadjeuet ikat tadjoë,
 ban lakoe proë meunan dali
 Po meukoeta sang geumeuniet,
 ban aneu' miet dja' meugatji
 Oelōn geudhōt meugriet-meugriet,
 geujoe teubiet han djeuet lawi

Masa phōn-phōn geupoewajang,
 koelit pisang geukheun geubri
 'Oh trōih teudja' keunan teusrang,
 geutjo' poelang teuma lagi
 Antōsan kheun 'oh nan haba,
 poteu radja deungo rawi
 Dji'é' oebah ba' ie moeka,
 beungèh raja hana sakri
 Tamsé apoej moeka mirah,
 neumeuloedah paihpoeih sari
 Sang meutab-tab meusoe babah,
 beungèh djoeah Ampōn Doeli
 Wie ngon oeneun doem neupandang,
 neuteuntang meuntroë ngon wadi
 Radja-radja oelèebalang,
 teumakōt sang geupoh maté
 Ea' masa njan sikoetika,
 bandoem rata iem droë saré
 Han lé sidroë meusoeara,
 oereung toeha meuntroë wadi
 Leubèh sidjeuem meunan bagoë,
 teuma doedoë sabda Doeli
 Pakri lakoe wahé meuntroë,
 oelōn sidroë malèe keudji
 Padoem lawét lōn mat nanggroë,
 han tom meunoë na teudjali

Niba' oedéb lôn lam boemoë,
 gèt bah djinoë leugat lôn titi
 Keupeue sit lôn radja meugah,
 bahrôlah doemna sipa'i
 Idja pinggang lôn ka teuhah,
 bandoem leumah 'èerat keudji
 Wahé meuntroë toeha moeda,
 idin gata lôn prang Deuli
 Oelôn dja' tjo' poetroë moeda,
 aneu' radja nanggroë Deuli
 Meung goh asé ban lôn tjinta,
 han lôn ridla gob peukeudji
 Njoë pat nanggroë hoekôm gata,
 tabôh radja baranggari
 Keu oelôn bè' ta'ingat lé,
 taniet maté takhanoeri
 Bah oelôn dja' peuseutèt até,
 rèt dalam glé beuranggakri
 Gata bandoem bè' soesahan,
 soelôtan la'én djeuet tabri
 Bè' tapiké keu lôntoean,
 oelôn paban ka teukeudi
 Meunan sabda ba' dèelat sjah,
 habéh soesah meuntroë wadi
 Mangkoe Boemi peu'é' seumah,
 djoendjông titah radja aseuli

Ampōn dèelat radja meugah,
 pakon soesah wahé doeli
 Pakon meugriet neumeulangkah,
 boet boebé drah bah kamoë tji
 Bahlé kamoë dilèe boengka,
 oeba' radja nanggroe Deuli
 Keupeue sit doem kamoë njang na,
 meung njo radja 'ajéb keudji
 Gèt bah maté ban sinaroë,
 keutjhi' sagoë meuntroë wadi
 Meung njo sit kon koetika njoë,
 doem kamoë peuleumah boedi
 Ampōn dèelat meureuribèe,
 bahlé dilèe prang kamoë tji
 Toeankoe tinggaj di djoerèe,
 neu'eu lagèe teuma pakri
 Meung goh maté kamoë doemna,
 njang radja han lōn bri keudji
 Oeroë njoë lōn toentoet bila,
 lōn prang koeta nanggroe Deuli
 Mangat djithèe nanggroe Atjèh,
 han peue dalèh bah djitoeri
 Tjoet Poetroë bintang peureuséh,
 Toeankoe neuprèh kamoë taki
 Nanggroe Atjèh goh djitoeban,
 mano' djantan boekon gasi

Bandoem seudōng ngon goelantan,
 bah djilawan mangat meuri
 Bè' djisangka oereueng inong,
 mameung-mameung djimeutaki
 Meunalèe lōn tōb ngon njawong,
 ban njang keunong oelōn asi
 Meung goh maté lōn teukeupa',
 han lōn bri dja' Ampōn Doeli
 Sit lōn peutrōih peue neukheunda',
 walèe djara' lōn hana gli
 Bahlé djitrōh dalam peutoë,
 toean poetroë bah bè' djibri
 Deungon toelōng Toehan sidroë,
 doe'a sinoë Ampōn Doeli
 Laman hila niba' djaroë,
 lōn proh peutoë lōn wiet koentji
 Meung han meunan hanlé lōn woë,
 gèt lōn boih droë bè' 'ajéb keudji
 Ampōn dèelat éntja Alah,
 lōn meulangkah idin neubri
 Mangkoeboemi 'ohnan seumah,
 beudèelat sjah até radli
 Soekatjita hana bagoë,
 sabda meunoë Ampōn Doeli
 Meung njo meunan tabitjara,
 haj mama'nda Mangkoeboemi

Bè' lé lawét djeunoë sigra,
 dja' paré'sa doem sipa'i
 Tahimpōn ngon balatantra,
 na taboengka tanoh Deuli
 Lōn pi sadjan deungon gata,
 dja' prang koeta toeeng poetroë ti
 'Ohnan sabda radja nanggroë,
 geulakèe droë doem keumali
 Poteu neu'é' oe meuligoë,
 bahlé 'ohnoë saboh rawi

VIII

Amma ba'doe lawét-lawan,
 lōn peugah ban Mangkoeboemi
 Neukrah ra'jat lam doem makam,
 ka neupeusan doemna wadi
 Joeë peu'asé doem beukajlan,
 goeda kandran ngon sipa'i
 Deungon gadjah moebalōhan,
 doem peusoekan dong meuriti
 Beudé toemba' leumbéng sadjan,
 doem beukajlan joeë peu'ili
 Ngon meureujam sikin panjang,
 doem alat prang nanggroë Deuli
 Djadèh boengka dja' oe Midan,
 prang soelōtan radja Deuli

Djitrôn ra'jat toenong barôh,
 moeplôh reutôih ribèe keuti
 Até seu'oe bandoem soenggôh,
 hana piôh trôn djeueb biti
 Di koeala doem meusapat,
 bandoem ra'jat ngon sipa'i
 Kapaj hasé doem sileungkab,
 peudieng alat han lé khali
 Na tjit ladôm dja' rèt darat,
 djikrah ra'jat oelèe ili
 Boebé geunggam sjah beudèelat,
 phôn di barat trôn meuriti
 Di Teuroemon ngon Meulabôh,
 bandoem ka trôih ra'jat Doeli
 Kapaj le that haj teungkoe beh,
 djisa'ôh lam lhō' di pasi
 Ampôn dèelat di meuligoë,
 neutrôn doedoë deungon wadi
 É' oe kapaj lapéh beusoë,
 boengka djeunoë Pò djôhari
 Hana piôh malam oeroë,
 até seungkoë hana sakri
 Njang rèt darat saboh bagoë,
 moeplôh katoë ra'jat meuriti
 Sara geudja' géumeusapra,
 dalam rimba doem dji'é' glé

Djeueb-djeueb nanggroë geubri haba,
 keudjroeen moeda doemdji saré
 Phôn di Atjèh Pasè Meura'sa,
 trôih oe Langsa Salahan Hadji
 Doem pahlawan teuga-teuga,
 bandoem geuba dja' prang Deuli
 Han tréb lawét lôn tjalitra,
 doemna tantra trôih ba' biti
 Labôhan Deuli trôih doem tantra,
 loea koeta Radja Deuli
 Meuhimpôn doemna béntara,
 moeploh la'sa ribèe keuti
 Njang di ra'jat han é' takira,
 Alah haj ja Po lôn Rabbi
 Dja' rèt la'ôt dja' rèt darat,
 ka meusapat doem oe Deuli
 Misé sidom meunan djaj that,
 'oh meusapat ta'eu é' gli
 Oereueng Deuli ngieng lakoean,
 doemdji jôh njan ploeeng ba' biti
 Djiploeeng sidroë dja' oe peukan,
 djidja' kheun ban djipeugah kri
 Sahbanda deungo peuneugah,
 geumeukeumaih lé geu'ili
 Dja' paré'sa doem kapilah,
 panè langkah keunoë sipa'i

Geubri saleuem poemeulia,
 panè gata phōn geusoedi
 Ho boe tadjā' peue tamita
 lōn ngieng tantra le han sakri
 Oereueng Atjèh seu'ōt leugat,
 nanggroë barat kamoë prang Deuli
 Di Atjèh kamoë beurangkat,
 nabsoe hadjat dja' prang Deuli
 Kamoë piōh sinoë si'at,
 lheueh njan moepeurab binèh pasi
 Meung na gasèh gata sahbat,
 djalan teupat takheun siri
 Meunan narit oereueng teuka,
 woë sahbanda landja keumali
 Ka meunè angkatan teuka,
 sidroë radja meugah han sakri
 Hana lé tréb lheueh niba' njan,
 beudoih angkatan dong meuriti
 Balatantra goeda meureujam,
 trōih tjoeram ba' koeta Deuli
 Ra'jat gala' doem poh reuntam,
 ramè kawan han é' kheun kri
 Piōh pajah bandoem rakan,
 ba' wa'tèe njan doem meutjakri
 Hana that tréb doeë' éseutirahat,
 geumoepakat geuprang Deuli

Trōn lé sabda niba' Dèelat,
 neutanjong pakat doemna meuntri
 Wie oeneun meuntroë doem meusapat,
 sadjan dèelat Mangkoeboemi
 Geumoepiké njang moseulihat,
 tanjong pakat lom ba' kali
 Toh njang patōt deungon sjarat,
 seu'ōt leugat Mangkoeboemi
 Sara geukheun Ampōn dèelat,
 njang gèt soerat dilèe neubri
 Oe lam koeta tajoee euntat,
 ba' halarat Radja Deuli
 Takheun narit njang moseulihat,
 tapeu'ingat na bè' keudji
 Meung geukheunda' keu seulamat,
 beu geu'euntat poetroë Siti
 Njo bit meunan titah dèelat,
 peugèt soerat bè' lé lawi
 Mangkoeboemi njang seumoerat,
 karangan gèt that djroh han sakri
 Sikeudjab ka asé keumaih,
 geupeuleumah oe ba' Doeli
 Neuteugon tjab lé khalipah,
 Radja meugah that ahali
 Teuma geudjō' ba' pahlawan,
 lhèe sikawan that beurani

Beudoih leugat djibeudjalan,
 geudoeë' kandran goeda tidji
 Ngon sikeudjab trōih lé landja,
 oe pintō koeta Radja Deuli
 Djipeugah ba' oereueng kawaj,
 kamoë dja' tabaj radja nanggri
 Moemeunabsoe dja' ngadab radja,
 lōn mè haba njan keu Doeli
 Kawaj pintō ngo tjalitra,
 ka djiboeka leugat koentji
 Pahlawan lhèe leugat djiba,
 joeb Singahsana dong meuriti
 Djipeudjō' soerat ba' béntara,
 teuma djiba ngadab Doeli
 Jōh njan leugat geuparé'sa,
 panè teuka phōn geusoedi
 Pahlawan lhèe djawab sabda,
 kamoë teuka djeu'ōh nanggri
 Nanggroë Atjèh Koeta Radja,
 lōn mè sabda Ampōn doeli
 Djipeudjō' soerat teuma sigra,
 lé béntara radja Deuli
 Jōh njan radja teurimong soerat,
 boeka leugat geu'eu pakri
 Teuma geudjō' ba' wadi droë,
 tabeuet djeunoë peue geurawi

Ladjoe geubeuet hadapan dèelat,
 soegeu djroh that sang soe bangsi
 Meunoë bangon haba soerat,
 deungo sahbat lôn bōh rawi
 Alhamdoe lélah phōn-phōn ajat,
 poedjoë halarat po lôn Rabbi
 Fahmat saleuem keu Moehamat,
 panghoelèe oemat baranggari
 Waba'dahoe ngon hōreumat,
 lôn peu'èdat radja Deuli
 Radja Atjèh nama kamoë,
 lôn dja' keunoë oeoba' Doeli
 Nabsoe hadjat dja' tjōm djaroë,
 njang adoeen droë radja Deuli
 Djara' gampōng oelôn sapra,
 lôn blōh rimba tan kamoë gli
 Lôn hadjat keu poetroë moeda,
 adé' radja nanggroë Deuli
 Padoem lawét lôn meutjinta,
 gohlom kada Toehan neubri
 Masa dilèe wahé radja,
 seulangké ka keunoë lôn bri
 Lôn joe djimè ngon areuta,
 ban sikada kon la'sa kati
 Sit tatoela' oeléh gata,
 le that haba njan tarawi

Han takaboej lakèe kamoë,
 tathèe that droë oereueng ahli
 Antōsan lōn doem tajoe woë,
 nama lōn njoë tapeukeudji
 Boeet han patōt meunan bagoë,
 radja nanggroë aneu' Abeusi
 Sang meugah meung gata sidroë,
 bandoem kamoë di joeb gaki
 Ba' lōn sangka masa dilèe,
 djroh meuteuntèe hana sakri
 Gata ngon lōn bè' djeuet sitrèe,
 njan lōn lakèe poetroë ahli
 Teuma djeunoë la'én roepa,
 tan lōn sangka meunan beugi
 Ngo lōn peugah wahé radja,
 hana goena le that tjakri
 Meung takheunda' keu seulammat,
 adoë ta'euntat keu lōn tabri
 Poetroë Hidjō taba leugat,
 lōn meuhadjat keu éseutiri
 Meung njo tabri ban lōn pinta,
 lōn toeeng gata tèelan ahli
 Deungon oelōn sah sjèedara,
 han lé da'wa baranggakri
 Meung han tatém meunan roepa,
 peukong koeta wahé Deuli

T'ameukeumaih himpōn tantra,
 lōn prang gata koeta lōn oengki
 Tapeu'asé ngon poepalèh,
 singoh djadèh lōn kanoeri
 Lōn dja' sidèh nanggroë Atjèh,
 beugèt taprèh doem djeueb biti
 Bè' meutanggōh han lōn rila,
 tabri haba doem njang dhaki
 Soë gèt lōn prang nanggroë koeta,
 deungon lōn ba poetroë siti
 Meung njo lōn prang gata radja,
 roegoë raja hana sakri
 Ra'jat maté moeplōh la'sa,
 gata pi sa lōn poh sari
 Oelōn pasoë lam glab boeta,
 gata radja malèe keudji
 Njang poetroë njoë meuhat lōn ba,
 tohkeu laba tjoeba kheun kri
 Lōn tjrè nanggroë lingkeue la'öt,
 han lōn takōt baranggari
 Sideupa han lōn tém soeröt,
 bè' tapeukeudjöt lōn hana gli
 'Ohnan haba dalam soerat,
 sjah beudèelat pham areuti
 Mirah moeka ta'eu poetjat,
 beungèhneu that hana sakri

Neutheun até ba' wa'tèe njan,
 sabda njoë ban Ampōn Doeli
 Ngo lōn peugah hé antōsan,
 dja' kaman gata ta'ili
 Tadjā' bri thèe oebea' dèelat,
 djaweueb soerat hana lōn bri
 Peue njang nabsoe geumeuhadjat,
 ba' oelōn that soeka radli
 Beukit nabsoe geumeung moeprang,
 joeë prèh diblang doem sipa'i
 Joeë peukeumaih ngon geudoebang,
 bah tameutjang na ta'eu tji
 Mangat leumah toh njan djantan,
 kon meung gobnjan njang beurani
 Sinoë pi na tjit pahlawan,
 baranggadjan han lōn oendi
 Radja gata that goerangsang,
 geumeung goentjang nanggroë Deuli
 Han peue salah beudoih reudjang,
 joeë peu'é' prang kamoë han gli
 Meung kon ngon lōn pi han padra,
 radja gata that beureuhi
 Bit pi meunan han lōn taba,
 han peue tjoebea oereueng Deuli
 'Ohnan sabda ba' Soelōtan,
 Atjèh pahlawan hirōb bibi

Lheueh hōreumat djitrōn sinan,
 geudoeë' kandran maséng bagi
 Teuma trōih lé oebea' khimah,
 khalipah leugat neusoedi
 Jōh njan pahlawan lé peuseumah,
 djikisah bandoem djirawi
 Awaj akhé doem habaran,
 ban peuneusan Radja Deuli
 Djikheun bandoem ba' Soelōtan,
 meung batjoet tan na djiboeni
 Radja Atjèh ngo riwayat,
 amarah that hana sakri
 Wadi Meuntroë neuhej leugat,
 peusapat bandoem sipa'i
 Neukheun singoh djadèh moeprang,
 tagoentjang koeta ta'oengki
 Joeë peu'asé doem sibarang,
 peukakaih prang goeda tidji
 'Oh lheueh sabda ba' khalipah,
 sit ka keumaih doemna Dhangki
 Sit meung djiprèh srōt peurintah,
 goeda gadjah ka meuriti
 Teudoeë' dilèe oereueng Atjèh,
 lōn alèh blah Radja Deuli
 Boeet poeprangan tjit ka djadèh,
 han peue dalèh sit ka asi

Tjō'ma peudeueng meureujam beudé,
 doem ka asé dong meuriti
 Bandoem ra'jat tjit ka asé,
 toemba' beudé kamareuti
 Doem angkatan dji'é' saré,
 bandoem grōb lé doem djinari
 Gadjah goeda doemna kandreuen,
 badjèe doem beusoë khoesani
 Aneu' beudé meuribèe peutoë,
 seuligoë ngon ali-ali
 Leumbéng kapa' mat di djaroë,
 ladōm tja'tjoë djipeunari
 Tjoekōb leungkab ban sinaroë,
 rèt déh rèt noë dong meuriti
 Ba' malam njan doem meudjaga,
 laseuka doem ngon sipa'i
 Teuma beungoh soeboh oeroë,
 han peue peugoë doem beutoih lé
 Geupèh tambō paloe geundrang,
 ka djadèh prang ban doea si
 Doea piha' teubiet oe blang,
 ba' tapandang djaj djeueb biti
 Boenjoë-boenjoëjan neusoe toenjè,
 soe seuroenè ngon napiri
 Djitrōn ra'jat sidroë sanè,
 gèt that ramè lam blang Deuli

Bandoem seu'oe han peue peugah,
 moeka djoeah sang habeusi
 Saban-saban ban doea blah,
 hana tiwaih saho oendi
 'Oh trōih oe blang dong meureumpan,
 moepasoekan dong meuriti
 Maséng hadab ateueh lawan,
 toh njang simban deungon droëdji
 Njang meugadjah sabé gadjah,
 meudjeumeulah doem meuriti
 Rèt déh rèt noë sit ka keumaih,
 ban doea blah geuhej asi
 Njang meugoeda sabé goeda,
 ramè raja hana sakri
 Panglima prang ngon béntara,
 lawan grada tjit ka meuri
 Njang di ra'jat la'én roepa,
 maséng djeumba doem geubahgi
 Jōh masa njan prang geupoega,
 gadjah geugoesa ngon tjeumeuti
 Ban njang patōt doem meudjeumba,
 dji'é' landja doem meuriti
 Maséng-maséng soeet seunjata,
 ladōm tjō'ma bie' khoesani
 Djimoepoh-poh hana reuda,
 reuloih djocngka patah gaki

Njang pahlawan sabé teuga,
 djimoewa-wa saling sali
 Djimeutjrôn-tjrôn keudéh keunoë,
 oelah bagoë ban boebiri
 Deumpé' soera' kiam boenjoë,
 hana meusoë blah toh oendi
 Rèt déh beuhe rèt noë toengang,
 djitob djitjang pi hana gli
 Djimeuta'-ta' ngon geudoebang,
 ngon sikin panjang toemba' bahri
 Na sikeudjab meunan bagoë,
 tjahja oeroë han lé meuri
 Meudhōj abèe ateueh boemoë,
 oereueng moeprang njoë han lé meuri
 Darah njang rō ateueh boemoë,
 thō sinaroë ngon dhōj gaki
 Ramè that prang han peue peugah,
 saban gagah ngon beurani
 Njang maté disinan reubah,
 habéh langkah ngon raseuki
 Teuka la'én that bahrōlah,
 leubèh gagah ba' ta'eu ri
 Raja that prang han peue piké,
 le that maté ra'jat Deuli
 Oereueng Atjèh dji'é' sabé,
 djihej saré moekhalapi

Pahlawan njang teuga-teuga,
 djipét mata djikab bibi
 Até doem jakin dalam dada,
 ateueh radja bè' rōh roedi
 Keubit-bit han djitém tiwaih,
 ban doea blah bit beurani
 Doemnan maté han é' peugah,
 hana oegah ra'jat Deuli
 Djitob djita' deungon peudeueng,
 ladōm oereueng poh ngon tjamtji
 Tanggoë oe glé soe seumeureueng,
 han tjit djiploeeng njang geutoeri
 Takalon prang kalang-kalōt,
 abèe seupōt pado' biti
 Meung sidroë tan njang teumakōt,
 sang leue' meulōt tarōh asi
 Phōn beungoh kon moeprang sabé,
 le that maté prang meu'oendi
 Hana reunggang boebé padé,
 djimeutjang sabé bie' beureuhi
 Hingga seupōt 'asa oeroë,
 rèt déh rèt noë ban doea si
 Fiōh jōh njan oeroë malam,
 toh njang ka tan doem geusoedi
 Geupèh tambō kiam boenjoë,
 ra'jat djiwoë oelèe ili

Oereueng Atjèh doem kapilah,
 woë lam khimah doem sipa'i
 Reu'oh teubiet ta'eu bōh-bah,
 moeka mirah hana sakri
 Oereueng Deuli njang po nanggroë,
 doem sinaroë woë ba' Doeli
 Oe lam koeta doem piōh droë,
 dèelat doedoë radja nanggri
 Geubri salén boengong djaroë,
 maséng bagoë doem geubagi
 Ra'jat gala' seu'oe han soë,
 han djithèe droë singoh pakri
 Tanglima prang wadi meuntroë,
 keudéh keunoë oelèe ili
 Maséng-maséng eu rakan droë,
 djikalon soë tan keumali
 Soë njang hana trōih djiriwang,
 maté di blang woë ba' Rabbi
 Ka maté keunong geudoebang,
 ba' djimoeprang poebla nanggri
 Geujoe dja' tjo' manjèt doemna,
 tanom sigra bè' djeuet keudji
 Fan doea si meunan roepa,
 teungoh sindja doem dji'oengki
 'Oh meuteumèe njang ka maté,
 poebarōh lé bè' bèe keudji

Toeha moeda geubeuet tahalé,
 ka meusampé toelōng Doeli
 'Oh ka asé doem sinaroë,
 wadi meuntroë bri moepeuti
 Bandoem ra'jat bè' lé laloë,
 éh sinaroë bè' lé tjakri
 Djaga keumawaj le sileumpaih,
 lingka khimah oelèe ili
 Bè' djeuet moesōh keunan leupaih,
 sit djroh indah djipeudoeli
 Meunankeu boeet hana teudōh,
 trōih soeboh beudoih sipa'i
 Meusoe tambō ra'jat beudoih,
 gamèh-gamoh doem sipa'i
 Peukajan prang ngoej oe asoë,
 oe blang djeunoë lom dji'ili
 Mita lawan djimeukiloë,
 misé baroë goh lom oendi
 'Oh meuroempa' deungon lawan,
 djimeuheuntam njan djimeutadi
 Njang maté sinan teureuban,
 hana meung djan djikheun pakri
 Le that maté deungon roesa',
 ladōm pipa' mata gaki
 Ladōm poentōng han lé tapa',
 ladōm roesa' beukah bibi

Njang tan toeah ngon bahgia,
 boeta mata ban doea si
 Saboh bangon reuloih djoengka,
 keunong tjō'ma ba' djitadi
 Siteungoh ri njang malang that,
 gob tjo' alat djih geutadi
 Sit tinggaj meung badan boelat,
 djiploeeng leugat poetéh gaki
 Peudeueng djimè ka gob reuböt,
 djih teukeudjöt teuhéng goesi
 Oereueng ramè kalang-kalöt
 sang leue' meulöt deungon noeri
 Oeroë njang trang djeuet keu seupöt,
 abèe djipöt hana khali
 Kilat peudeueng kablang-kablöt,
 njeum teumaköt takalon gli
 Bit pi doemnan soenggōh that prang,
 talō meunang goh lom meuri
 Saban beuhe sabé toengang,
 djimeutob tjang hana khali
 Oereueng Atjèh bit that gagah,
 prang han oegah oereueng Deuli
 Rètédéh beuhe rètnoë djoeah,
 sang han bitjah han lé oendi
 'Oh ka seupöt djilōb oeroë,
 maséng woë droë oebea' biti

Meunankeu boeet han tom laloë,
 geunab oeroë han peue rawi
 Padoem lawét prang raja that,
 peuet djeumeu'at doemnan lawi
 Ka siboeleuen meu'adoeat,
 sabé koeat ngon beurani
 Watèe malam geumoepiöh,
 peuthö reu'öh ban doea si
 'Oh ka oeroë moeprang soenggöh,
 beudé djitjöh hana khali
 Djiböh aneu' bie' beureutöh,
 djipoh moesöh radja Deuli
 Rètnöë toengang rètdéh oetöih,
 ra'jat pah-pöh ploeeng djeueb biti
 Djitaköt keu boh meureujam,
 aneu' lanam soe meu'i-'i
 Oereueng Atjèh bit that gagah,
 djeuet keu soesah oereueng Deuli
 Mon doem djidoë pisang djitjah,
 teukeudi grah teuma pakri
 Moesöh teuka ramè han soë,
 peunoh nanggroë radja Deuli
 Djeueb-djeueb teupat loeweue' sagoë,
 moesöh ka doë lingka nanggri
 Njankeu sabab keusoesahan,
 makanan han djeuet peu'ili

Han djeuet djidja' lé meung 'ohnan,
 djitakōt han trōih keumali
 Oereueng Atjèh saboh bagoë,
 lingka nanggroë oelèe ili
 'Oh meuteumèe baranggasoë,
 tjit djikiloë han lé soedi
 Lawét-lawan moeprang sabé,
 le that maté ban doea si
 Gadjah goeda le meugoelé,
 teutie' bangké bée khèb hanji
 Oereueng nanggroë pi le roesa',
 di oereueng dja' leubèh lagi
 Hana saho lom meureuleue',
 tjit sabé bheue' adoe sa'ti
 Pahlawan le njang ka gadoh,
 djipo roh tan lé raseuki
 La'én teuma oelèebalang,
 panglima prang njang beurani
 Radja Atjèh kalon lakoe,
 prang njoë ladjoe that oegahri
 Dalam até teuka koejoe,
 lakèe bantoe lom oe nanggri
 Padoem lawét njang ka moeprang,
 mantong timang goh lom oendi
 Oereueng Atjèh pi goerangsang,
 sabé pasang oereueng Deuli

Ba' oeroë njan radja Atjèh,
 njang that leubèh ba' barang ri
 Neukalon prang makén leubèh,
 kadang djadèh malèe keudji
 Neumoepakat deungon meuntroë,
 sabda meunoë niba' Doeli
 Pakri lakoe njang gèt djeunoë,
 wahé meuntroë deungon wadi
 Ba' peurasat até kamoë,
 moeprang meunoë hana meukri
 Han é' talō oereueng nanggroë,
 that geutanjoë malèe keudji
 Padoem na tréb moeprang njang ka,
 mantong padra gohlom oendi
 Pahlawan le ka seureupha,
 balatantra ngon sipa'i
 Kadang-kadang singoh loesa,
 meunang gradā oereueng Deuli
 Tjoeba paké njang sidjahtra,
 toh bitjara wahé meuntri
 Pakri 'akaj rèt seulamat,
 moesōh le that oelèe ili
 Tjoeba tipèe ngong moseulihat,
 tamoepakat bè' lé lawi
 Ba' lōn tan lé na bitjara,
 piké gata njang sidjati

Beu'é' talō taprang koeta,
 ba' lōn rila baranggakri
 Asaj sjarat bandoem gata,
 bè' inanja ateueh kami
 Meunan neukheun oelé radja,
 bandoem rata iem beudiri
 Maséng-maséng mita hilah,
 toh rèt moedah talō Deuli
 Neu'eu bandoem moeka oebah,
 neungieng ba' babah ngon tapa' gaki
 Na sikeudjab meunan roepa,
 seu'öt sigra Mangkoeboemi
 Sara geukheun ampōn radja,
 laman kira wahé doeli
 Saboh 'akaj ba' lōn leumah,
 reudjang keumaih han lé lawi
 É' taroentōh koeta loewaih,
 tabeureukaih radja nanggri
 Radja Deuli é' tatawan,
 ba' pikéran hamba Doeli
 Hana peue lé le pahlawan,
 é' djipadan lé sipa'i
 Djeunoë njang gèt wahé radja,
 ngon areuta lawan sa'ti
 'Oh dji'eu patōng roepia,
 tan seutia lé barangri

Meung njo meunan han meusakét,
 é' taseupét oereueng Deuli
 Lam meureujam tabōh reunggét,
 lōn piké sēb lhèe peuet goeni
 Tapoebeudé dalam koeta,
 mangat gli-geunta doem barang ri
 Djimeuseumoh piléh areuta,
 toeha moeda aneu' nanggri
 Radja Atjèh ngo hareutoë,
 ban kheun meuntroë Mangkoeboemi
 Gala' até hana bagoë,
 meujoeë djeunoë tatjoeba tji
 Teudoeë' 'ohnan peurintah njoë,
 radja nanggroë lom lōn rawi
 Neupeudjamèe doem sinaroë,
 njang ra'jat droë meuntroë wadi
 Neubri salén bandoem rata,
 toeha moeda baranggari
 Ra'jat gala' hana tara,
 toeeng karōnja niba' Doeli
 Maséng babat ila kada,
 ban njang djeumba tandi waki
 Imeum keutjhi' ngon panglima,
 la'én doemna ngon sipa'i
 Habéh rata peusalénan,
 maséng doem njan ra'jat nanggri

Woë oe teumpat ba' malam njan,
piké padan prang njoë pakri.

IX.

Amma ba'doe soeboh bandrang,
meusoe geundrang kian boenjoë
Kon lagèe sèt lôn bōh ajat,
prang geukarat blahdéh blahnoë
Bandoea si meugoerangsang,
pasaj boeet prang sit ka ragoë
Oereueng Atjèh that goerangsang,
teubiet oe blang doem sinaroë
Takalon djidong doem meureuntang,
sang poepalang lingka nanggroë
Misé beuklam ka lheueh pakat,
jōh njan leugat han lé iem droë
Hoeë meureujan njang raja that,
djitakat oe koeta nanggroë
Koeta Deuli keunan hadab,
reunggét le that lheueh djipasoë
Lheueh djipasoë djilhiet poesat,
meusoe leugat sang lham nanggroë
Djipo reunggét na ban oenoë,
doem meuseupeue' keudéh keunoë
Poetéh-poetéh dji'eu meuseupeue',
srôt teudoeë'-doeë' rō lam anoë

Oereueng teungoh moeprang soenggōh,
 djilét moesōh ri njang ka toë
 Bangon asèe peutjro' lapōh,
 habéh djiblōh lam-lam doeroë
 Meunan bangon ba' tapandang,
 soenggōh that prang asoë nanggroë
 Oereueng Atjèh le that djitjang,
 poetōih pinggang poetōih djarōë
 Ba' masa njan oereueng Deuli,
 baranggari han djitoesoë
 Seuntreu' teuma dji'eu saré,
 ka leumah lé areuta njoë
 Djingieng reunggét ka rō lam blang,
 djiteugom reudjang gala' hansoë
 Tjoet ngon rajeu' moeda seudang,
 'oh djipandang leungo asoë
 Djimeukoeet-koeet bōh lam idja,
 han djikira keunong tasoë
 Oeba' reunggét tjit djiraba,
 soenggōh raja doem sinaroë
 Djimeule-le tjo' areuta,
 djimeuda'wa sabé keudroë
 Gob poh di roeng han djikira,
 meunan roepa asoë nanggroë
 Ra'jat Deuli keunong tipèe,
 hana djithèe doemnan bagoë

Dji'eu reunggét ka meuseubèe,
 moeplōh ribèe dalam anoë
 Poetōih keu'ieng poetōih singkèe,
 beukah oelèe keunong tja'tjoë
 Sinan le reuhot njawong padèe,
 oe djoerèe han lé trōih djiwoë
 Siteungoh ri ta'eu roempōng,
 reuloih hidōng keunong beusoë
 Ladōm beukah broee' keutoepōng,
 le boh poenggōng han lé asoë
 Oereueng Atjèh eu meunan lakoean,
 gala' han ban doem sinaroë
 Dji'eu moesōh ka teureuban,
 ngon reunggét njan djih moepaloë
 Areuta pi tan djih pi simpan,
 djimeulawan doem ka wahwoë
 Gadoh ilah sabab boet njan,
 doem pahlawan gadoh ragoë
 Meung sidroë han lé seutia,
 keu radja han lé piké droë
 Piha' gala' keu areuta,
 nabsoe kaja djih moepaloë
 Gadoh beuhe deungon teunga,
 ploeeng djigoeda lam-lam doeroë
 Dalam hoeteuen djidja' meusa,
 ba ploeeng areuta dalam djaroë

Han lé riwang oe lam koeta,
 doem djiboengka djiboih nanggroe
 Njang tan maté keunong noega,
 hana gisa lé meung sidroe
 Tantra Deuli habéh bitjah,
 ra'jat leupaih keudéh keunoë
 Ladôm djiwoë ba' khalipah,
 djidja' peugah ka moepaloë
 Radja Deuli deungo kisah,
 até soesah hana bagoë
 Rôt ie mata ilé limpah,
 tan lé ilah rèt peulheueh droë
 Lam até piké soesah that,
 moesôh meuhat tamong keunoë
 Oelôn djidrob sit dji'ikat,
 malèe lôn that hana bagoë
 Pakri lakoe toh ngon ilah,
 pat lôn peugah ngon tan sidroe
 Jôh masa njan radja meugah,
 neu'é' pantaih oe meuligoë
 Dja' meuteumèe ngon adé'nda,
 poetroë moeda njang sambinoë
 Neudja' bri thèe doempèue haba,
 han lé koeta ka moepaloë
 Ban saré trôih oe atana,
 poteu radja neuhej poetroë

Wahé adé' tjahja mata,
 dja' ban doea keunoë beu toë
 Lôn meung wa'siet saboh haba,
 oeba' gata haj sambinoë
 Poetroë deungo peurab sigrâ,
 ngon ie mata randō-ranoë
 Neuwa neutjôm lé kaka'nda,
 seureuta neumarit meunoë
 Alah adé' boengong koendō,
 Poetroë Hidjō njang sambinoë
 Adoeen gata djadèh talō,
 ra'jat oendō ka djiboih droë
 Tan lé daja doë tapaban,
 lôn meung lawan han lé moeproë
 Moesōh le that doem meureumpan,
 di lôn rakan han lé sidroë
 Ngon sabab njan e poetroë intan,
 lôn peusan ba' gata djeunoë
 Gata adé' bè' soesahan,
 hoekōm Toehan poteu sidroë
 Meung njo ta'eu oelôn ka tan,
 gata bangsawan tapeudjō' droë
 Tadjō' koeta mideuen sadjan,
 keu Soelōtan prang nanggroë njoë
 Bè'keu adé' tameulawan,
 meunang njan han lé geutanjoë

Soë toebé thèe kheunda' Allah,
 neubri leupaih ba' bahja njoë
 Teuma batjoet hé meuih meuntah,
 ba' radja sjah lakèe kheun droë
 Beukit gata geumeuhadjat,
 oe barat keudéh geupoewoë
 Talakèe beumeungklèh teumpat,
 joeë peutjakab saboh peutoë
 Peutoë katja roepa hilaam,
 doeë' didalam gata poetroë
 Proë haj ka tröih adé' badan,
 oe nanggroë njan radja poewoë
 Bè' ta'é dilèe oe darat,
 oeba' dèelat lakèe djeunoë
 Tajoeë djitrôn bandoem ra'jat,
 boebé neumat radja nanggroë
 Oe koeala beumeusapat,
 bandoem ra'jat lakoë binoë
 Peuseumahan ban njang 'adat,
 dja' hōreumat gata poetroë
 Mè beureutéh saboh reugam,
 dara agam baranggasoë
 Boh mano' saboh djireugam,
 meunan matjam wahé poetroë
 'Oh meuhimpōn doem sineuna,
 tajoeë plè teuma lam ie soengoë

Dalam la'ot meuhadjana,
 mieng koeala bahlé beudoë
 Keumoenjan tatöt hé adé'nda,
 tameudoe'a leueng ngon djaröë
 Tameulakèe ba' Rabbana,
 toelōng hamba hé po kamoë
 Beumeuteumèe ngon lōn sinan,
 ba' teumpat njan wahé poetroë
 Meung na gaséh niba' Toehan,
 njankeu djalan é' lھےuh adoë
 Njankeu adé' oelōn peusan,
 la'én sit tan haba kamoë
 'Oh nan marit ba' Soelōtan,
 röt meureumpan ie mata droë
 Keu adé' droë that gaséhan,
 ban lhèe gob njan ka geupoh droë
 Hana daja tameung lawan,
 djandji Toehan Po geutanjoë
 'Oh lھےuh marit radja meunan,
 neutrōn jōh njan di meuligoë
 Loea koeta neubeudjalan,
 han soë toeban neudja' sidroë
 Hana rakan sadjan neuba,
 sajang raja ta'eu bagoë
 Tinggaj adé' droë poetroë moeda,
 bandoea dalam meuligoë

Radja Deuli neumeudoe'a,
 Naga Goentala jōh njan djeuet droë
 Djitrōn oe la'ōt lé dji'ili,
 mantong dali tō' 'an djeunoë
 Djeuet takalon Aloe Naga,
 loeaih raja that seureuloë
 Poetroë soesah hana reuda,
 ngon ie mata rō meutaloë
 Teu'ingat narit kaka'nda,
 hantjō rasa lam até droë
 Toe an poetroë moë meugeuroentjang,
 doem dëndajang ka djipoh droë
 Jōh njan marit poetroë moeda,
 e adé'nda po samlakoë
 Pakri lakoe tabitjara,
 moesōh teuka leugat ka toë
 Ka djitamong dalam koeta,
 pakri daja wahé adoë
 Tameulawan han koeasa,
 ba' lōn kira gèt tasom droë
 Bahlé taploeeng oe loea koeta,
 lam beuloeka tapado' droë
 Jōh goh moesōh kalon roepa,
 dja' oedéhta bè' lé laloë
 Meunan narit poetroë moeda,
 seu'ōt bangta neukheun meunoë

[Wahé Tjoet ka' gèt neusaba,
 Toehan asa ngieng geutanjoë
 Bahlé oelôn dja' bitjara,
 tinggaj gata di meuligoë
 Beuteutab até dalam dada,
 bè' that goebra boengong geutoë
 Meung goh maté oelôn toean,
 njang Tjoet ka' han lôn bri paloë
 Siribèe kri oelôn padan,
 lôn meulawan bit pi sidroë
 Lôn meulakèe oebe' Toehan,
 limpah rahmat njan malam oeroë
 Saba dilèe hé wéleudan,
 peue goena'an beukit tamoë
 Meunan narit bangta moeda,
 kheun ba' Tjoetda toean poetroë
 Aneu' radja njan ban doea droë.
 tjahja meusimpreue hoe sang oeroë
 Poetroë Hidjō deungo sabda,
 piloe rasa lam até droë
 Roepa tjeudaih tan seunabé,
 si'akan misé bintang paroë
 Neumoë ba'e ngon ie mata,
 sang meutia poetōih taloë
 Neutheun até sit neusaba,
 boengong djeumpa ajeuem djaroë

Lam bilé' neutamong ladjoe,
 até toenoe hana bagoë
 Sit neuba'e lam beuradoe,
 boengong meuloe soesah han soë
 Tinggaj adé' bangta moeda,
 diloa di sinan sidroë
 Soesah até doekatjita,
 dalém pi ka tan di nanggroë
 Doe' teupakō hana haba,
 ka trōih masa teuka roegoë
 Wie ngon oeneun neuparé'sa,
 neungieng rata keudéh keunoë
 Kheunda' Alah Po njang asa,
 oebah roepa po samlakoë
 Kon lé misé ban ma'noesia,
 boekon roepa ban geutanjoë
 Teukeudi khalikōn 'alam,
 keu meureujam djeuet samlakoë
 Ba' masa njan that geumeuntam,
 moeprang tjoeram hana bagoë
 Tadeungo soe saré kiam,
 sang-sang ka lham koeta nanggroë
 Wie ngon oeneun doem djiheuntam,
 gadoh agam baranggasoë
 Meung sikeudjab hana diam,
 soe meureujam sang ka toeloë

Ra'jat Atjèh kalon matjam,
 la'én ragam sang oeroë njoë
 Oe liköt djisoeröt tadjam,
 han lé tjoeram that djipeutoë
 Le that ra'jat maté karam,
 boeet meureujam djipoepaloë
 Ra'jat Atjèh ploeeng meutaga,
 até lia doem sinaroë
 Han djidjeuet lé lawan grada,
 sa'ti raja meureujam njoë
 Phôn beungoh kon prang djipoega,
 tō' an sindja seupöt oeroë
 Ba' masa njan si'at reuda,
 ra'jat gisa habéh doem woë
 Poetroë Hidjō oelōn kisah,
 até soesah di meuligoë
 Han teudōh ie mata limpah,
 bantaj basah doem sinaroë
 Teu'ingat keu poteu radja,
 kaka'nda ngon adé'nda droë
 Teupiké keu ajah boenda,
 hantjō rasa até poetroë
 Poetroë moeda alōh-alah,
 reubah limpah lam meuligoë
 Tō' an malam sabé doeka,
 poetroë moeda mantong neumoë

Sajangteu that ta'eu lagèe,
 boengong koembèe neupoh-poh droë
 Ba' badan beukit na boelèe,
 meuhat teuntèe neupo djeunoë
 Dalam meunan meuih teusoerat,
 oe joeb leugat neutrôn sidroë
 Neudja' kalon djeueb-djeueb teumpat,
 ho beurangkat salèh adoë
 Keudéh keunoë neudja' mita,
 poetroë moeda sara neumoë
 Ie mata trō hana teudōh,
 meugeuroepōh njan neupoh droë
 Adé' gadoh han meuhō lé,
 salèh ka maté dalam prang njoë
 Sajangteu that keu poetroë Hidjō,
 tahe gante tinggaj sidroë
 Sara neudja' ka teupakō,
 ie mata rō sang neumanoë
 Addeen lōn gadoh dalam makam,
 salèh karam njawong sampoë
 Njoë lom adoë njan pi meunan,
 'oh noë malam hana lom woë
 Pakri njang han rindoe deundam,
 meuih teuhoepam tinggaj sidroë
 Njang na neu'eu sit meureujam,
 di dalam koeta meuligoë

Njang adoë hana meuhó lé,
 salèh maté adjaj sampoë
 Reumo' badan 'oh neupiké,
 poetroë siti lé weueh han bagoë
 'Oh han é' lé neuemoemita,
 oe atana ladjoe neuwoë
 Neubeuradoe ateueh keuta,
 teungeut hana po sambinoë
 Teuma beungoh oeroë bandrang,
 beudoih reudjang di meuligoë
 Meusoe geundrang ngon napiri,
 dangdi moeri le that bagoë
 Oereueng Atjèh dong meureuntang,
 djipeu'é' prang salé 'aloë
 Toemba' leumbéng misé djeundrang,
 djigoentjang ba' koeta poetroë
 Meureujam keuramat pi djilawan,
 ba' masa njan soenggöh han soë
 Soekèe moesöh le that simpan,
 hana meung djan djiböt djarcë
 Soenggöh that prang ba' masa njan,
 kheunda' Toehan Po geutanjoë
 Ka tröih masa ba' masa njan,
 han é' theun ban doem sinaroë
 Toetöng pi that hoe ngon mirah,
 jöh njan beukah ka moepaloë

Meureujam keuramat nanggroë Deuli,
 'oh nan djandji masa poeroë
 Habéh daja ka teukeudi,
 hana meukri patah keudroë
 Poetōih laraih meukhan doea,
 meugeulawa soe that toeloë
 Njan keuneuleueh meusoeara,
 soe meutaga hana bagoë
 Teukeudjöt doem hamba Alah,
 djiploeeng reubah doem teupipoë
 Soe meugō-gō raja leupaih,
 sang sioelah karam boemoë
 'Oh leueh ba' njan seungab ladjoe,
 hana lé soe meureujam njoë
 Ka meugoelé sinan teudoe,
 han lé meusoe teudoeë' keudroë
 Ra'jat djiploeeng gabra-gabroe,
 barat timoe djidja' som droë
 Oereueng Atjèh até seu'oe,
 peurab ladjoe keunan peutoë
 Pintō koeta ka djibangkang,
 ta'eu leukang doem sinaroë
 Teuhah pintō tamong reudjang,
 oelèebalang wadi meuntroë
 Dja' meurōn-rōn bandoem kawan,
 tjo' rampasan asoë nanggroë

Meuih ngon pira' meukeukoejan,
 la'én doem njan le that bagoë
 Ra'jat Atjèh até reuja,
 ka sidjahtra doem sinaroë
 Nanggroë Deuli lheuëh talō ka,
 ra'jat radja tan lé sidroë
 Sjah beudèelat lōn tjalitra,
 reunèh moeka hana bagoë
 Ka trōih hadjat ban neupinta,
 nabsoe sigra dja' tjo' poetroë
 Oereueng iréng peuet limong nam,
 rindoe deundam keu sambinoë
 Meung batjoet tan até lia,
 moesōh hana lé meung sidroë
 Tamong langsōng oe atana,
 ka neumita keudéh keunoë
 Poetroë Hidjō neu'eu hana,
 neuparé'sa djeueb-djeueb sagoë
 Soesah até silagoëna,
 sabab hana boengong oeroë
 That meunjeusaj po meukoeta,
 ta'eu moeka sang oereueng moë
 Meunang ba' prang han sampōna,
 njang neutjinta goh seuleusoë
 Ra'jat maté moeplōh la'sa,
 ngon areuta le that roegoë

Tan meuteumèe njang neumita,
 malèe raja 'oh trōih neuwoë
 Dalam meunan ampōn dèelat,
 djeueb-djeueb teumpat lom neupeutoë
 Lam-lam loengkie' doem djeueb teumpat,
 goh lom moëpat toean poetroë
 Leubèh sidjeuem neumita njan,
 Soelōtan 'akaj ka wah-woë
 Tan meuteumèe poetroë intan,
 lam peuradoean tamong doedoë
 Neulōb tirè doem tabéngan,
 habéh simpan neureuet taloë
 Kheunda' Alah sidroë Toehan,
 ba' masa njan rab moepaloë
 Poteu radja ban trōih keunan,
 ladjoe pangsang han thèe keudroë
 Niba' teudong reubah pangsang,
 Soelōtan radja geupoedjoë
 Leumah neu'eu lam peuradoean,
 neu'eu poetroë njan roegha han soë
 Dalam bantaj neusom moeka,
 ngon ie mata rō meutaloë
 Ba' masa njan ampōn radja,
 ra'jat gabra doem sinaroë
 Geuba leugat oebea' keuta,
 até geunta hana bagoë

Neuwa djaroë droë oebe' dada,
 Po Meukoeta pangsang laloë
 Masja Alah poetroë moeda,
 bit-bit roepa indah han soë
 Poeléh hireuen sipeungandja,
 keu Rabbana ingat poedjoë
 Teubiet lé soe toerōn sabda,
 poetroë moeda sit neupeugoë
 Beudoih adé' boengong Djeumpa,
 bè' lé lina po sambinoë
 Abang ka trōih keunoë teuka,
 dja' toeeng gata boengong oeroë
 Njan barō phōn poetroë moeda,
 neubleut mata neupandang soë
 Teukeudjōt that hana tara,
 neungieng radja dong sinan toë
 Ban neukalon ateueh roepa,
 sagaj hana lom neutoesoë
 Han tom neu'eu dilée masa,
 jo sang geumpa badan asoë
 Ba' wa'tèe njan poetroë moeda,
 beudoih sigra tjoela-tjaloë
 Neuploeeng ladjoe dja' oe loea,
 jōh njan radja mat di djaroë
 Sara neukheun hé adé'nda,
 ho tahala po sambinoë

Bè' haj intan salah sangka,
 niet lôn hana meudéh meunoë
 Bè' beungèh adé' keu hamba,
 ka lôn teuka ba' teumpat njoë
 Beukit oelôn darôhaka,
 hoekôm gata sit haj poetroë
 Ban njang hadjat di adé'nda,
 oelôn rila laba roegoë
 Djara' lôn dja' nanggroë Atjèh,
 harab bè' beungèh adé' poetroë
 Tan lôn pandang hitam poetéh,
 lôn piléh njang Hidjō sroëbroë
 'Oh lôn pandang roepa gata,
 dalam djaga sang lam loempoë
 Sang-sang teumpat lam sjeuroega,
 meunan rasa wahé adoë
 Ngon sabab njan tjahja mata,
 oelôn rila sibarang proë
 Djeu'ôh gampông keunoë teuka,
 keu gata lôn **harab sidroë**
 Gaséh sajang oelôn pinta,
 deungon soeka tatoeeng kamoë
 Tan pat la'én oelôn moemat,
 sit rapôh that bandoem taloë
 Keu adé' njang lôn tjinta that,
 njankeu sabab trôih lôn keunoë

Padoem soesah ngon meularat,
 djeueb-djeueb teumpat hana soenjoë
 Salèh djeunoë barō mangat,
 poetéh loemat trōih lōn keunoë
 Jōh dilèe lōn leungo gōgō,
 Poetroë Hidjō gob hareutoë
 Ngon nan mantong lōn ka poengo,
 njankeu hé po doemnankeu proë
 Gala' até lōn han sakri,
 lam lōn tjakri lam lōn poedjoë
 Lōn harab adé' njang hōbbi,
 bè' tabantji lōn sambinoë
 Beukit hadjat tadjā' oe lam glé,
 lōn boh até taba sidroë
 Ban hadjat intan djōhari,
 han lōn oengki meung sidjaroë
 Sibarang boeet lōn na sadjan,
 peue tjita'an lōn peusampoë
 Deungon toelōng sidroë Toehan,
 baranggadjan han moepaloë
 'Oh nan toetō poteu radja,
 poetroë moeda ngo hareutoë
 Bantjineu that dalam dada,
 sang neutampa leugat djeunoë
 Hana leumah njan oe loea,
 é' neusaba po sambinoë

Neutheun até lagèe raja,
 ba' dada teugon ngon djaroë
 Neu'ingat hana meusampé,
 han é' asé sibarang proë
 Leumah jōh njan saboh piké,
 masa njan lé marit meunoë
 Djaroë doea lé neu'angkat,
 ampōn dèelat pajōng kamoë
 Bè' toeankoe meusjeugrōj that,
 boekon hadjat lōn ploeeng sinoë
 Kon nabsoe lōn dja' oe loea,
 bè' that gabra toeankoe droë
 Lōn toerōt sibarang sabda,
 ban njang soeka rila kamoë
 Oepama lōn meunan matjam,
 boh mamplam di dalam djaroë
 Seukin pi na dalam reugam,
 mata tadjam misé tadjōë
 Toeankoe sie ban njang kheunda',
 beukit soera' seu ngon gigoë
 Hana é' lé oelōn toela',
 doem sang di ba' srōt oe boemoë
 Beukit poeti'pi é' masa',
 meung ka gala' teugah han soë
 Meunan miseue paté' laman,
 ban soeka'an ridla kamoë

Ba' that ba' lé oelōn kheun han.
 panè djalan lheueh lōn ba' droë
 Panè oereueng njang beuhe that
 geutham Dèelat ba' masa njoë
 Soë meung peulheueh lōn ba' hadlarat,
 meung kon djihadjat lōb lam boemoë
 Doemankeu na djeunoë si'at,
 keupeue le that lōn kheun djéh njoë
 Éntja' Alah wahé Dèelat,
 sampoë hadjat ba' oeroë njoë
 Njang na batjoet hé djeunoelang,
 gaséh sajang keu lōn sidroë
 Aneu' meuntoej han lé ma wang,
 adé' lōn sajang tan lé sinoë
 Lōn eu ka tan djeueb sagaj bé,
 salèh maté salèh boih droë
 Tan pat la'én lōn harabpan,
 sit malingkan Dèelat djeunoë
 Beukit neuhadjat keu lōntoëan,
 ba' hoekōm Toehan bè' rōh paloë
 Ban njang peusan Rasoelōlah,
 bè' neu'oebah meung sidjaroë
 Tjit beu djroh that Dèelat papah,
 na bè' teulaih oeroë doedoë
 Sipeureuti haj njang lōn peugah,
 boet boebé drah raja paloë

Lôn ngon Dèelat goh lom nikah,
 hoekōm Alah goh seuleusoë
 Rindoe deundam lôn han tara,
 Ampôn Radja di lôn lakoë
 Meung na gaséh Po Meukoeta,
 lôn neuba oe Atjèh djeunoë
 Bè' tréb lanteue neutjo' langkah,
 tan pa'idah piōh sinoë
 'Oh trōih keudéh tameunikah,
 tapeudjeulaih oetang toenoë
 Ka sampōreuna hoekōm Alah,
 han lé salah meudéh meunoë
 Sabab Dèelat bie' radja meugah,
 meusjeuhoerah djeueb 'alam njoë
 Meung njo han gèt neupeurintah,
 meuhat salah teuma doedoë
 Adat meung kon dalam soesah,
 tameunikah bahlé sinoë
 'Oh lheueh nikah tabeurangkat,
 nanggroë barat keudéh tawoë
 Akan teutapi koereueng 'adat,
 djeuet gob oepat teuma doedoë
 Geutanjoë djikheun bie' boelō that,
 teuntèe meuhat han gèt boenjoë
 Sabab Doeli kon ba' teumpat,
 misé 'adat dilèe poeroë

Ka meutoeka ba' gob pandang,
 djikheun seueh prang kon ba' nanggroë
 Tameunikah di dalam prang,
 hana reumbang meunan bagoë
 Peue ka tan lé teumpat aman,
 hoka doem njan koeta nanggroë
 Ho atana njan ngon taman,
 keupeue tjit njan joem meukatoë
 Meung tapeudjeuet baranggapat,
 gadoh 'adat djeuet keu roëgoë
 Ajéb nama Ampōn Dèelat,
 njankeu beuthat peulahra droë
 Gèt bah tawoë oe Koeta Radja,
 bè' lé likhà boengka djeunoë
 Meunan paté' piké meusra,
 Ampōn Radja toh pakri proë
 Beukit ridla meunan pakat,
 laman hadjat teuma djeunoë
 Neubri keu lōn saboh teumpat,
 njang moseulihat lōn doee' sidroë
 Neubri saboh peutoë katja,
 oelōn pinta ngon lét sidroë
 Di dalam njan piōh hamba,
 tō' an masa trōih oe nanggroë
 Trōih oe Atjèh Koeta Radja,
 teubiet teuma lōn lam peutoë

Tameunikah jōh njan sigra,
 doem peukara ka seuleusoë
 Meunan hadjat lōn Meukoeta,
 na soepaja bè' moepaloë
 Hoekōm Alah bè' meulangga,
 bè' djeuet dèesja bandoea droë
 'Oh nan narit poetroë moeda,
 poteu radja gala' han soë
 Tjit æukaboej ban njang pinta,
 tan neuda'wa meung sidjaroë
 Ban njang hadjat boengong keumang,
 neujoeë toekang doea lhèe droë
 Djipeugèt lé reudjang-reudjang,
 boeet toekang leugat seuleusoë
 Peutoë katja meuih meuseundi,
 djawareudi indah han soë
 Ba' teumpat doeë' poetroë siti,
 geu'ili oe Atjèh nanggroë
 Teuma poetroë pira' lipat,
 neulōb leugat dalam peutoë
 Di dalam neukoentji leugat,
 Ampōn dèelat han djeuet peutoë
 Diloëa mantong neu'ambat,
 han djeuet neumat deungon djaroë
 Bitpi meunan poetroë singkat,
 até dèelat seunang han soë

Neupiké hana tréb lambat,
 trōih oe teumpat Atjèh nanggroë
 Teuntèe asé misé kasat,
 han peue karat meudéh meunoë
 Tamsé eungkôt dalam poekat,
 trōih oe darat tasō' taloë
 Tapeulakoe ban njang hadjat,
 tan lé dapat djipeulheueh droë
 Meunan piké po djōndjōngan,
 ba' masa njan titah meunoë
 Hé adé'nda batèe badan,
 padjan intan njang gèt tawoë
 Doem peukakaih ka asélan,
 preubeukajlan doem sinaroë
 Lōn toeeng pakat ba' tjoet intan,
 ban njang padan po sambinoë
 Beukit patôt ba' takira,
 gèt taboengka singoh oeroë
 Tan peureulèe meudiwana,
 hana goena lé doee' sinoë
 Soë toebé thèe boeet Rabbana,
 neubri bahja keu geutanjoë
 Djaweueb poetroë sabét beuna njo,
 ban narit Po toeankoe droë
 Gèt bah singoh tabeurangkat,
 na bè' lambat trōih oe nanggroë

Meung tapiōh sinoë lambat,
 lōn takōt that teuma paloë
 Meunan narit pira' oephām,
 sjahi 'alam gala' han soë
 Lheueh pakat njan oeroë malam,
 seungab kiam doem sinaroë
 Singoh beungoh han peue piké,
 sit ka asé beukajlan woë
 Toemba' leumbéng deungon beudé,
 doempeue saré ka seuleusoë
 Peutoë katja lé dji'angkat,
 oeléh ra'jat na peuet plōh droë
 Dalam mangkoe peu'é' leugat,
 iréng ra'jat ribèe katoë
 Oereueng Deuli soesah han ban,
 jōh masa njan bandoem djimoë
 Sabab tjré ngon poetroë intan,
 salèh padjan trōih lom neuwoë
 Agam dara poh droë jōh njan,
 sajang intan hana bagoë
 Djiseutèt ladōm dja' sadjan,
 oe Labōhan iréng poetroë
 Padoem lawét dja' lam rimba,
 ba' koeala ladjoe tanggoë
 Geupeu'é' lé peutoë katja,
 dalam béhtra njang seureuloë

Teuma dèelat radja meugah,
 neumeulangkah han lé laloë
 Bandoem ra'jat sit ka keumaih,
 trôn peurintah taré' taloë
 Taré' sa'oh boengka djadèh,
 nanggroë Atjèh radja neuwoë
 Oereueng Deuli tinggaj sidéh,
 até peudéh hana bagoë
 Ngon ie mata moë teuséh-séh,
 moeka han gléh lé meung sidroë
 Dji'ingat bintang peureuséh,
 that djigaséh hana bagoë
 Sajangdji that han treu paban,
 ngon sabab njan 'akaj wahwoë
 Nanggroë talō radja ka tan,
 keunong tawan toean poetroë
 Hana daja tameung lawan,
 hoekōm Toehan Po geutanjoë
 Oereueng Deuli le njang pangsan,
 reubah sinan dalam anoë
 Ladōm oereueng njang seutia,
 djiboengka sadjan tjoet poetroë
 Na siteungoh la'én roepa,
 djigisa han lé oe nanggroë
 Han djiriwang lé oe Deuli,
 dji'ili doem keudéh keunoë

Ladōm djiwèh dja' oe Djambi,
 oe Peutawi ladōm boih droë
 Njang ladōm oe Salahadji,
 la'èn lagi Poelo Sampoë
 Meunan bangon doem peurintah,
 lawét leupaih toean poetroë
 Nanggroë Deuli gadoh toeah,
 kheunda' Alah 'oh nan tanggoë,
 Mideuen koeta timoh naleueng,
 tan lé oereueng han soë eumpoë
 Ngon atana ka teugageueng,
 doem teueng-bajeueng ngon meuligoë
 Di peukan timoh beuralueng,
 di mideuen timoh beuranoë
 'Oh ka tan lé poetroë boeleuen,
 boe djimakeuen tamsé doeroë
 Tjang tjeuradi ateuh papeuen,
 aneu' bajeuen djimeunjanjoë
 Ba' Ilahi lôn meu'inseuen,
 tjoet boeleuen boe mangat asoë
 Tjhi' ngon poeti' toeha moeda,
 meunan doe'a asoë nanggroë
 Piöh siat hé sèedara,
 saboh-leu'a ka seuleusoë.

X.

Amma ba'doe lôn riwayat,
 Ampôn dèelat leupaih boengka
 Nanggroë Deuli neutjré teupat,
 dalam bakat kapaj radja
 Até seunang tan doeka'an,
 poetroë intan sadjan neuba
 Padoem lawét peulajaran,
 sapeue pi tan teuka mara
 Mangat até doem sinaroë,
 wadi meuntroë ngon béntara
 Hana leumbat padoem oeroë,
 ka trôih djeunoë lam koeala
 Lam lhō' Atjèh Darōsalam,
 oeba' makam njang meulia
 Ka djitôt lé ngon meureujam,
 soe geumeuntam boebé raja
 Teukeudjôt doem inong agam,
 ili tjoeram oe koeala
 Djimeunabsoe kalon matjam,
 Sjahi 'Alam ka meugisa
 Oe Koeala Djambō Ajé,
 keunan trôih lé doem sineuna
 Jōh njan Sabang ngon Oelèe Lheue,
 goh lom moepeue goh moebanda

Oeteuen rimba han peue peugah,
 sinan meugah djidoe' Naga
 Mantong oeteuen rimba Toehan,
 peulajaran soesah raja
 Didarat goh lom na djalan,
 masa njan goh trōih Oelanda
 Njankeu sabab seuma' han soë,
 kon ban djeunoë moedah raja
 Si'at tadjat' reudjang tawoë,
 masa poeroë le that mara
 Naga Goentala djidoe sinan,
 geungo sinan soe djitaga
 Koeala Atjèh Koeta Meusapi,
 sinan dali Aloee Naga
 Loeaih raja sang aneu' la'öt,
 sinan eungköt le sibeuna
 Masa kapaj piöh meuriti,
 doem keulasi até reuja
 Djipeutrôn lé sambō' radi,
 maséng ili mieng koeala
 Poteu radja ba' wa'tèe njan,
 ngoej peukajan njang meulia
 Koelahkama njang keu'amaihsan,
 sileungkabpan ka seudia
 Roepa indah tan teuladan,
 djroh badan samlakoë roepa

Keumaih asé ngon peukajan,
 neutamong jōn njan lam goentia
 Dja' meungadab toean poetroë,
 sambinoë Tjoet Hidjō Moeda
 Neupeugah ka trōih oe nanggroë,
 jōh njan meunoë neumeusabda
 Wahé adé' meuih 'adjeumat,
 poetéh loemat tjahja mata
 Geutanjoë ka trōih oe teumpat,
 pakri mangat njang meurasa
 Nanggroë Atjèh ka trōih geutanjoë,
 wahé poetroë gon sidjahtra
 Panglima prang wadi meuntroë,
 doem ka keunoë dja' toeeng gata
 Pakri njang gèt wahé intan,
 tatrōn sadjan ngon lōn sigra
 Poetroë deungo kheun soelōtan,
 toendō' jōh njan batjoet moeka
 Jōh njan marit boengong meuloe,
 neumeusoe lam peutoë katja
 Ban njang titah di toekankoe,
 lōn pi nabsoe hana da'wa
 Laman harab gaséh sajang,
 lōn dagang meuseukin hina
 Lōn meulakèe ba' djeunoelang,
 hadjat pandang ra'jat doemna

Ra'jat Atjèh meugah le that,
 lôn meung lihat pakri roepa
 Salèh sit na ban riwajat,
 oeba' Dèelat oelôn pinta
 Bri moepeuti dalam nanggroë,
 joeë trôn keunoë toeha moeda
 Lôn keumeung eu ngon mata droë,
 ban sinaroë agam dara
 'Oh wa'tèe doem djitrôn keunoë,
 boengong djatoë beuna djiba
 Tjhi' ngon poeti' baranggasoë,
 djimè keu kamoë doea roepa
 Mè beureutéh saboh reugam,
 dara agam bandoem beuna
 Boh mano' sabon djireugam,
 njang la'én han oelôn rila
 Meunan hadjat lôn hé doeli,
 harab neubri ban lôn pinta
 Radja deungo kheun poetroë ti,
 dalam até adjéb raja
 Sabab han tom dilèe-dilèe,
 meunan lagèe njoë ban teuka
 Kon ban 'adat oe ngon teubèe,
 oereueng dilèe ampeueng radja
 Bitpi meunan boet gandjé that,
 radja dèelat tan meuda'wa

Ban njang poetroë neumeuhadjat,
 kheun ba' ra'jat „han djeuet hana”
 Bri peurintah ban sabda njan,
 trôn bandoem njan oe koeala
 Beuna djimè peuseumahan,
 ban lakèe njan poetroë moeda
 Beureutéh deungon boh mano',
 beureudjang tō' han djeuet hana
 Mieng koeala neujoee toempō',
 binèh loebō' njang that raja
 Ba' masa njan han peue kheun lé,
 djitrôn saré sang seureungga
 Toenong barōh timoe barat,
 doem meusapat keunan teuka
 Oeroë malam trôn tan teudōh,
 moeplōh reutōih la'sin la'sa
 Ban njang pinta meuih seuneupōh,
 sit neupeutrōih oelé radja
 Doem beureutéh ka meuseu'è,
 keunan djimè ra'jat doemna
 'Oh takalon ba' tapandang,
 ka djeuet njeum sang goenong raja
 Ngon boh mano' doem meutaboe.
 siba' ba' oe manjang njeum na
 Phôn beungohkon hingga seupōt,
 oereueng angkōt hana reuda

Poetroë joeë rō doem lam la'ōt,
 ban njang patōt djikeureudja
 Bandoem boeet njan boeet moebadhé,
 tan neupiké oelé radja
 Sabab nabsoe gala' até,
 lahé sihé neuthèe hana
 Lam koeala rō beuhabéh,
 la'ōt poetéh ie meuboera
 Anjot keunoë anjot keudéh,
 beureutéh dalam koeala
 Asoë nanggroë eu lakoean,
 bandoemdji njan 'adjéb raja
 Djimeutoetō sabé rakan,
 keupeue meunan boeet di radja
 Hana sidroë njang na toeban,
 boeet tjoet intan Hidjō Moeda
 Hingga asé sileungkabpan.
 jōh masa njan ra'jat gisa
 Soebra ra'jat doem djimoeproë,
 boeet moepaloë han tom njang ka
 Maséng-maséng woë oe gampōng,
 panjot tanglōng lōn tjalitra
 Poetroë Hidjō dalam koerōng,
 goh lom trōn lam peutoë katja
 'Oh bān leupaih ampōn doeli,
 sabda neudja' bri ba' béntara

Poetroë Hidjō moë meu'i-i,
 ingat abi hej kaka'nda
 Neuboeka lé teuma koentji.
 poetroë ti teubiet oe loea
 Neutjo' apoej mat koemoenjan,
 neutōt jōh njan sigra-sigra
 Meuharoe bèe asab koemoenjan,
 poetroë jōh njan meusampeuna
 Sara neumoë sang njeum pangsang,
 ilé sadjan ngon ie mata
 Ba' masa njan teukoej tangaih,
 djarōë doea blah beu'oeet sigra
 Bandoea blah hōj djarōë droë,
 ba' Toehan sidroë neumeudoe'a
 Hé Halarat gaséh sajang,
 toelōng reudjang ja Rabbana
 Meunan neukheun poetroë bintang,
 tjoet abang neuteu'oh nama
 Hé kaka'nda Radja Deuli,
 pakri djandji ngon adé'nda
 Masa dilèe dalam poeri,
 jōh phōn djandji talō koeta
 Neukheun ba' lōn toeankoe droë,
 neutjo' kamoë dalam bahja
 Padjan tjit lom trōihneu keunoë,
 meung kon djeunoë jōh na pa'sa

Meung na gaséh deungon sajang,
 toelōng reudjang lōn beusigra
 Jōh goh radja keunoë riwang,
 bè' lé lintang hé kaka'nda
 Radja Atjèh that goerangsang,
 nanggroë geuprang ka seureupa
 Teuma oelōn rōh lam djantang,
 bit that malang lōn lam dōnja
 Hé kaka'nda djantōng até,
 bè' neu'iem lé toeeng adé'nda
 Gaséh keu lōn beumeusampé,
 oedéb maté sapat doea
 Neutjo' leugat lōn di sinoë,
 ba sadjah droë djeunoë sigra
 Ba' radja bè' neubri kamoë,
 até lōn njoë hana ridla
 Bè' lambat lé wahé khalipah,
 neutjo' pantaih lōn that roega
 Toebōh lōn njoë ba' meutoeah,
 lōn seutèt ajah djeunoë sigra
 Meunan neukheun po sambinoë,
 han soenjoë ilé ie mata
 Bangon oedjeuen trōn oe boemoë,
 meunan bagoë lakoe roepa
 Kheunda' Alah sidroë Toehan,
 niba' at njan ngon meuleuha

Teungoh poetroë moë doeka'an,
 han moeban-ban sikléb mata
 Teuka reudō' njang seupōt that,
 deungon kilat blèt-blót tjahja
 Seupōt seupeuet jōh njan leugat,
 bandoem ra'jat até lia
 Lam la'ōt djibeudoih bakat,
 manjangpi that ie moeboera
 Teuka angèn blah rèt barat,
 meugoentjang that kapaj doemna
 Doemna tōngkang habéh karam,
 djiheuntam lé bakat toeha
 Ra'jat maté habéh doem lham,
 inong agam toeha moeda
 Doemna sambō' han peue peugah,
 abéh beukah doem meuleu'a
 Habéh maté hamba Alah,
 gadoh hilah deungon daja
 Bandoem kapaj dalam la'ōt,
 ka beusōt geuloembang tampa
 Inong agam that teumakōt,
 langèt seupōt glab goelita
 Ie la'ōt meupoeséng-poeséng,
 sang gaséng meugisa-gisa
 Doemna kapaj ka meutoenggéng,
 rōh lam poeséng lham ban njang na

Masa njan lé na ban kilat,
 teuka leugat saboh naga
 Badan raja roepa hibat,
 sang malakat doea mata
 Ba' kapaj poetroë lé djipeurab,
 doemna ra'jat tahe likha
 Doem teukeudjöt ploeeng teudab-dab,
 oe darat ka djiteureupa
 Dalam kapaj ba' doee' poetroë,
 tan lé sidroë ma'noesia
 Maséng peuglaih meung oentōng droë,
 keu tjoet poetroë han djikira
 Poteu radja até oegah,
 teugrōb pantaih tan neusadja
 Ploeeng oe darat bagaih-bagaih,
 poetroë indah ingat hana
 Han lé sajang keu tjoet poetroë,
 tinggaj sidroë dalam béhtra
 Oelèebalang wadi meuntroë,
 doem sinaroë ka djigoeda
 Poetroë Hidjō dalam kapaj,
 sinan tinggaj sidroë sadja
 That teumakōt han é' kheun haj,
 gadoh akaj deungon daja
 Neungieng naga roepa hibat,
 keunan leugat djipeuteuka

Ban boekét badan raja that,
 hoe meukilat doea mata
 Njankeu Radja Langkat Deuli,
 Toehan bri djeuet naga raja
 Njankeu adoeen Poetroë Hidjō,
 djilalō lam la'ōt raja
 Poetroë neuemoë beutangèhsan,
 ilé sadjan ngon ie mata
 Neupeudjō' droë oebea' Toehan,
 la'én djalan han lé daja
 Neumeudoe'a toean poetroë,
 toelōng kamoë ja Rabbana
 La'én niba' droëneu sidroë,
 baranggasoë han koeasa
 Ra'jat le meuribèe katoë,
 tan lé sidroë njang tinggaj na
 Doem ka djiploeeng wadi meuntroë,
 djibri kamoë eumpeuen naga
 Tan djisajang lōn hina'an,
 ba' piha' tan na sjèedara
 Meung kon toelōng gata Toehan,
 djadèh simpan lōn binasā
 Oereueng nanggroë lōn djibantji,
 djidja' bri keu eumpeuen naga
 Salèh' ohnoë ka teukeudi,
 ka neudjandji dilèe masa

Wahé Toehan njang gapoerōn,
 neupeulheueh lōn dalam bahja
 Radja Atjèh neudja' tjo' lōn,
 awaj neutrōn ban trōih naga
 Meunan neukheun poetroë indah.
 reubah limpah dalam béhtra
 Peutoë katja tan neupeuhah,
 neutakōt sileupaih hana tara
 Neumeuseulimbōt neu'éh teupat,
 bè' djitoepat ba' neusangka
 Bè' dji'oet lé naga djoengkat,
 meunan kasat boengong djeumpa
 Teungoh soesah tjoet bangsawan,
 naga keunan sit toë ka na
 Oe kapaj djililét badan,
 ba' masa njan dji'é' landja
 Djibōt oelèe koewien ikoe,
 kapaj ladjoe lé djipoetra
 Ka djiseupot deungon ikoe,
 ie la'ōt djoe sang meuboera
 Hantjō lajeue patah tihang,
 ka meugoentjang lagèe raja
 Habéh gadoh bandoem barang,
 teureubang oe la'ōt raja
 Kapaj meugisa ban seusoewé,
 oereueng maté ban sineuna

Sadjan bakat oelèe ili,
 soë kalon gli até geunta
 Soë njang kalon teuka sajang,
 kapaj djitjang djeuet keu roedja
 Oelèe naga lom meulajang,
 kapaj bintang karam landja
 Kapaj karam jōh njan leugat,
 njang seulamat peutoë katja
 Teumpat poetroë meuih adjeumat,
 sang keuramat lakoe roepa
 Peutoë timoe ban peulampōng,
 panjot tanglōng tan binasa
 Meusampé Toehan peulindōng,
 sit meutoelōng lheueh ba' mara
 Oereueng njang ka ploeeng oe darat
 doem meunadjat lakèe doe'a
 Oeba' Toehan meuhon rahmat,
 beuseulamat poetroë moeda
 Ban djikalon peutoë tan lham,
 dara agam até soeka
 Mangat até gadoh masam,
 niba' djipham ka sidjahtra
 Tan djitoepeue kheunda' Toehan,
 baranggan han soë da'wa
 Lom lheueh ba' njan naga sjoëtan,
 timoe badan ngon koepala

Djitjo' peutoë ba' doee' bintang,
 ka djitatang ateuh tjoela
 La'öt raja djidjeumeurang,
 ra'jat pandang weueh han tara
 Bandoem ba'e djipoh-poh droë,
 sajang poetroë ka naga ba
 Ka djitjo' lé naga pindoë,
 sajang roegoë poteu radja
 Naga raja doem djitjaröt,
 soe meukalöt sang tjémpala
 Landja tröih oe teungoh la'öt,
 doem geuba pöt bagaih raja
 Ra'jat pandang weueh han sabé,
 poetroë tan lé dji'eu roepa
 Ie mata rō bandoem ilé,
 sakét até that keu naga
 Kakeu djara' njan ngon darat,
 naga leugat seunom sigra
 Peutoë gadoh dalam bakat,
 sabab djeu'öh that han lé njata
 Gadoh leunjab djipeuseunom,
 ho djipeusom tan soë thèe na
 Salèh oedéb salèh maté,
 han tröih piké oereueng njang na
 Ban njang hoekōm Toehan Kadé,
 boeet Rabbi han djeuet soë da'wa

'Oh nan teutab toean poetroë,
 sambinoë djiba lé naga
 Tan djitoeban lé barangsoë,
 trōih an djeunoë meu'oh hana
 Salèh mantong lom teupat njan,
 salèh teureuban peutoë katja
 Han soë toekri keusoedahan,
 malingkan Alah Ta'ala
 Le that oereueng ka lōn soedi,
 soë na toekri oedjōng haba
 Meung sidroë tan trōih keutahwi,
 gèt di Deuli Koeta Radja
 Lam Poelo Wè Aneu' La'ōt,
 sinan eungkōt le wareuna
 Sang goeda meuih lam njan moebajang,
 le meunan njang kalon roepa
 Lhō' lam la'ōt han soë toeban,
 djareueng keunan soë djeuet teuka
 That bit meudjén ba' teupat njan,
 soë dja' keunan le binasa
 Lhō' dalam njan tan soë toe'oh,
 hana meu'oh han é' djoega
 Meukoedè-koedè taloë kawé,
 teudong sabé han po' dōnja
 Han po' tanoh doemnan oeloe,
 han meulakoe sipat djangka

Keunan njeum poetroë djipeudoe,
 boeet dioe adoeendji toeha
 Kadang keunan le njang waham,
 salèh makam la'én dōnja
 Tan na tō' thèe njang keumarang,
 oelōn peutrang bé sikada
 Lagèe haba lam Tapeusé,
 oemat ploeeng saré niba' Moesa
 Doem djilōb lam saboh reuhoeng,
 lheueh njan meuteumeung saboh dōnja
 Njankeu nanggroë likōt Boekét Kaih,
 njang loeaih Nabi peuhaba
 Salèh keunan poetroë djiba ploeeng,
 djeuet keu oereueng bie' djén diwa
 Ban lhèedji njan salèh djén pari,
 roepa ri djeuet ma'noesia
 Teuma moewoë lom ba' asaj,
 dalam 'akaj harōih é' na
 Misé haba aneu' tikōih,
 djeuet keu harōih habadji na
 Kajém-kajém gob leungo soe,
 meudeuroe leungo djitaga
 Ladōm kheun ie la'ōt paseueng,
 lam reuhoeng meusoe ban taga
 Hana meu'oh ba' oereueng pham,
 salah waham le so' sangka

Sabab hana meuteumèe dali,
 han soë toekri poebitjara
 Le doem oereueng meunan waham,
 soe taga njan geukheun naga
 Oereueng Atjèh meunan djipham,
 la'én waham djithèe hana
 Meunan djikheun doem sinaroë,
 naga tjo' poetroë bie' goentala
 Salèh glanteue ateueh la'öt,
 wa'tèe riböt toepheuen teuka
 Le that oereueng salah waham,
 han djitoeban tō' thèe hana
 Salèh bie' angèn poeténgbliōng,
 njang é' lambōng kapaj béhtra
 Han é' soë thèe peurintah njan,
 doem boet Toehan njang koeasa
 Djeuet tjit meunan neupeulahé,
 Toehan Kadé that kèewasa
 Atawa la'énpi sah tjit njan.
 tan soë toeban poebitjara
 Boet di Toehan Ilahōn Ha',
 ban njang gala' neupeuroepa
 Han é' djithèe lé doem énsan,
 boet di Toehan po rahsia
 Leupaih poetroë naga ba ploeeng,
 saboh roeweueng 'oh noë haba

Teudōh angèn gadoh boedoeeng,
 moewoë ie kroeng misé njang ka
 Han lé reudō' deungon kilat,
 peugeuih darat trang tjoeatja
 La'ōt teudōh tan lé bakat,
 moewoë teumpat lagèe njang ka
 Radja Atjèh Ampōn dèelat,
 meusjeugrōj that hana tara
 Keu tjoet poetroë sajangneu that,
 ilé meudrab ngon ie mata
 Han lé hiro njan keu ra'jat,
 woë oe teumpat sidroë sadja
 Tahe gante pira' lipat,
 han lé ingat doem peukara
 That neuseusaj hana bagoë,
 radja nanggroë doekatjita
 Padoem areuta le that roegoë,
 padoem paloë ngon panglima
 Ba' prang Deuli neutjo' poetroë,
 njang sambinoë aneu' radja
 'Oh trōih teuma dalam djaroë,
 hana trōih njoë ban neutjinta
 Han djan neuba trōih oe nanggroë,
 barō 'oh toë mieng koeala
 Ka teukeudi Toehan sidroë,
 tjoet poetroë djitjo' lé naga

'Oh neupiké meunan bagoë,
 radja nanggroë toembō' dada
 Niba' rasa gèt neutob droë,
 malam oeroë doekatjita
 Ngon sabab njan po samlakoë,
 até sangsoë dalam dada
 Di atana neudoeë' sidroë,
 si'oeroë han tom oe loea
 Tan pseudoeli lé keu nanggroë,
 laba roegoë han neukira
 Djimeudjeuet-djeuet bandoem meuntroë,
 peugèt nanggroë ban njang soeka
 Poteu radja tan hiro lé,
 djitoeeng wasé soë njang teuga
 Sabab tan poetroë nanggroë Deuli,
 dèelat doeli poengo gila
 Keusoedahan pakri ban roehé,
 dilōn tan lé toe'oh haba
 Walahoe 'alam hoedéb maté,
 Toehan Kadé thèe bit doemna
 Meu'ah ampōn wahé sahbat,
 'oh noë tammat lōn poemada
 Toelōng Toehan lōn harab that,
 limpah rahmat dalam dōnja
 Ampōn dèesja sikeulian,
 njang meuligan kamoë hamba

Oereueng peugèt njoë karangan,
 neubri aman ngon sidjahtra
 Neupeu'ampōn wahé Toehan,
 keusalahan doem bé njang na
 Gèt boeet narit salah waham,
 neu'ampōn njan ja Rabbana
 Oeroë doedoë tō' an Midhan,
 neubri gobnjan moebahgia
 Teuma oelōn beurōh sadjan,
 ngon tèelan dja' lam sjeuroega
 Keu njang karang ngon seumoerat,
 neubri rahmat bè' poetōih na
 Njang teudjoemah la'én lōgrat,
 halarat toelōng lom beuna
 Oereueng beuet ngon oereueng rawi,
 kisah Tjoet ti Hidjō moeda
 Harab rahmat lom beuneubri,
 saboh bahgi ban njang kada
 Sineumit-neumit rahmat asé,
 seunang até niba' doeka
 Beukit soesah na boebé glé,
 beupoeléh lé sikoetika
 Wa'tèe geukheun hikajat njoë,
 gadoh djeunoë doekatjita
 Meunan harab pinta kamoë,
 séb ka 'ohnoë lōn poemada

Ba' karangan bè' peue dalèh,
koereueng leubèh bè' tjeureutja
Keu lōn beuthat sit tagaséh,
beukit tan gléh kon lōn sahdja.
